

JON

Yesu Kilisi xolac nivuha wê Jon kivuu ge

Kiyang nôñ lam tu xomxo gê kibun

¹ Ilage vô buc taxlee ge, kiyang tyo dô. Kiyang tyo dô hixôn Anutu, di ici va Anutu. ² Vô buc mugên ilage i dô hixôn Anutu, ³ di Anutu nêl di xomxo tyo tung susu vihati, di susu ti o lam môp bangwe lêm. Nge, xomxo tyo tung susu vihati. ⁴ Di ici va ge mavuha kehe, di mavuha wê i vông ge linac vô xomxo mi he dô vac xêseac. ⁵ Xêseac wê i vông ge linac vac mapitoc, di mapitoc o tiyi wê ob hivun xêseac tige xôn ge lêm.

⁶ Anutu vông xomxo ti lam lê nêbê

Jon. ⁷ Jon lam nêl xêseac kehe kitong vô xomxo êñ nêb he vihati i ngô kiyang wê i nêl ge di vông i vin. ⁸ Ici va ge o xêseac tyo lêm. Nge, lam êñ nêb ob nêl xêseac tige kitong vô xomxo.

⁹ Xêseac tige lop mi lam kibun ga, di i xêseac nôñ wê ob linac lec xomxo vihati ge. ¹⁰ Ici va tung susu kibun ga di ici va lam dô kibun, léc xomxo kibun ga, he o xovô i lêm. ¹¹ La vac ben vigwe kehe lê, léc lie o kô i lec nivuha lêm. ¹² Léc xomxo wê kô i lec nivuha di vông i vin ge, od vông he tu Anutu nue. ¹³ Môp wê he tu Anutu nue ge o tiyi xocbê môp wê xomxo kibun ga kô nue ge lêm, di kehe o yêp vac xovôên wê xomxo vông ge lêm. Nge, Anutu vaci vông he tu i nue.

¹⁴ Kiyang lam tu xomxo gê kibun ga di i dô vac xe mahigun, om xe xê xêseac wê i vông ge. Xêseac tige Anutu vông vô nu tuc tived, di xêyaa vin lecên yuu kiyang nôn hivun i xôn. ¹⁵ Jon nêl xomxo tige kitong di keac vya levac ên nêbê, “Xomxo tyo tiga, wê a nêl kiyang lec ilage ên a nêbê xomxo ngwe wê ob val timuên ge luu a vêl, ên buc wê a gên ma ge, xomxo tiga dô tax.”

¹⁶ Ici va tu vizid viyang viyang ge kehe om vông vizid tibeac vô il luu vêl. ¹⁷ Ilage Anutu nêl xolac vô Moses mi i nêl vô xomxo, lêc xêyaa vin lecên hixôn kiyang nôn, Yesu Kîlisi vaci kô mi lam. ¹⁸ Xomxo ti o yê Anutu lec manôn lêm. Nu tuc tived wê dô hixôn Ma Anutu ge wê lam nêl Anutu kehe kitong vô il.

*Jon Lipacên nêl i kehe kitong vô xomxo
(Matyu 3:1-12; Mak 1:2-8; Luk 3:2-18)*

¹⁹ Yuda levac wê dô Jêlusalem ge vông xomxo wê mi si daa gee hixôn xomxo Livai ya la vô Jon di he la kinêg vô i ên nêbê, “Ông ge letya?” ²⁰ Om Jon nêl i kehe kitong yêp seac vô he di o yax vun lêm, om nêl i kitong ên nêbê i o Kîlisi ti wê he dô bin ge lêm. ²¹ Om he kinêg ên nêbê, “Om ông letya? Ông tiyi xocbê plopet Ilaija, me?” Lêc Jon nêl vô he ên nêbê, “A o Ilaija lêm.” Om he kinêg nang ên nêbê, “Ông ge plopet ti wê xe mi dô bin ge, me?” Lêc Jon nêl ên nêbê, “A o plopet tige lêm.” ²² Om he kinêg tii vac ên nêbê, “Ông ge letya? Xe obêc milax nêl kiyang tibêna vô xomxo wê vông xe lam ge? Om ông nêl ông kehe kitong vô xe.” ²³ Om Jon nêl vô he tiyi xocbê kiyang wê

plopet Aisaia kivuu ilage bêga nêbê, “A ga xomxo ti wê tyuc vya levac vac vigwe mahigun pileva ên nêbê, ‘Xam viac Apumtau môp wê ob lam vac ge i yêp nivîha.’”

²⁴ Xomxo tige, tibii Palisi vông he

lam, ²⁵ mêd he kinêg vô Jon ên nêbê, “Ông nêl ên ông nêbê ông o Kilisi lêm, di nêl ên ông nêbê ông o Ilaija lêm, di nêl ên ông nêbê ông o plopet tige lêm, lêc bêna lêc ông lipac xomxo ya mia?”

²⁶ Om Jon nêl ên nêbê, “A lipac xomxo ya mia pileva, di xomxo ti val le vac xam mahigun lêc xam o xovô lêm. ²⁷ A lam tax di xomxo tige obêc val timuên, lêc a o nigvîha tîyi wê aob piwelac yihi vêl ên su wê i vông ge lêm.” ²⁸ Jon nêl kiyang tige gê Betani wê yêp mia Jodan kehe vilu ganê. Vigwe tige wê Jon mi lipac xomxo vac ge.

Yesu ge bwoc sipsip nu wê Anutu vông i lam ge

²⁹ Titige Jon yê wê Yesu val ge om nêl ên nêbê, “Xam wê lê, ge bwoc sipsip nu wê Anutu vông i lam kibun ên nêb i lam yib di kitya xomxo nên nipaên vêl ge. ³⁰ Ge xomxo wê a nêl kiyang lec ilage ên a nêbê, ‘A lam tax di xomxo ti wê ob val timuên ge luu a vêl, ên buc wê a gên ma ge, xomxo tige dô tax.’ ³¹ A gên o xê xomxo tige lêm, lêc a lam lipac xomxo ya mia, ên a nêb a ob nêl xomxo tige kitong vô xomxo Islel.”

³² Nang dêc Jon nêl kitong bêga ên nêbê, “A xê wê Myakilôhông Ngibua lam gê kisii ganê tîyi xocbê menac tucluud di lam yêp lec Yesu kisii. ³³ A gên o xovô i lêm, lêc Anutu wê vông a lam lipac xomxo ya mia ge nêl vô a tax ên nêbê, ‘Ông obêc

wê Myakilôhô Ngibua lop mi lam dô lec xomxo ti ge od ông xovô bê xomxo tige wê ob lipac xomxo ya Myakilôhô Ngibua.’ ³⁴ A xê wê kiyang tige vô nôn lec ge om a nêl kitong bê xomxo tige, Anutu nu.”

Yesu keac xomxo yuudiyuu timu vô i vixa

³⁵ Vigwe vidiiên titige Jon le hixôn i nue ngivihhi yuu, ³⁶ léc yê wê Yesu val ge, om nêl ên nêbê, “Wê lê, ge bwoc sipsip nu wê Anutu vông ge.” ³⁷ Nu ngivihhi yuu ge ngô wê Jon nêl ge om la timu vô Yesu mi he la. ³⁸ Mêd Yesu pilepac i di yê wê yuu la vô i vixa ge om kinêg vô yuu ên nêbê, “Muu lam ên vatya?” Léc yuu nêl ên nêbê, “Labai, ông dô vac xumac tina?” Labai ge, kehe bêga nêbê xolac kehe. ³⁹ Om Yesu nêl vô yuu ên nêbê, “Muu lam wê lê.” Om yuu la hixôn Yesu mi la yê xumac wê Yesu yêp vac ge. Ge hiyôv manôn yuudiyuu wê hucên ge om yuu dô hixôn Yesu di vigwe buc.

⁴⁰ Xomxo yuu wê ngô Jon vya di la hixôn Yesu ge, ngwe Andlu wê Saimon Pita li ge, ⁴¹ om Andlu la vô li Saimon di nêl vô ên nêbê, “Xe xê Mesaia.” Mesaia ge, lê ngwe nêbê Kilisi di kehe bêga nêbê xomxo ti wê Anutu vông i lam ge. ⁴² Mêd Andlu kô Saimon mi yuu la vô Yesu, mêd Yesu yê Saimon di nêl vô ên nêbê, “Ông ge Saimon wê Jon nu ge, léc a ob nêl ông lêm bê Sipas.” Lê Sipas ge, Glik vya nêl bêga nêbê Pita, di kehe bêga nêbê ngidax.

⁴³ Vigwe vidiiên titige Yesu nêb ob la vigwe levac Galili om mîla vô Pilip di nêl vô ên nêbê, “Lam timu vô a.” ⁴⁴ Pilip yon Andlu yuu Pita, yon ben kehe Betsaida. ⁴⁵ Mêd Pilip la myag

Nataniel mi yêvô di nêl vô ên nêbê, “Xomxo ti wê Moses kivuu kiyang lec mi i yêp vac kipihac xolac di plopete kivuu kiyang lec hixôn ge, xe tulec i. Ge Yesu wê ma Josep vac vîgwe Nasalet.”
⁴⁶ Lêc Nataniel nêl ên nêbê, “Nôn nivîha ti ob val tyip vac vîgwe Nasalet lêm.” Lêc Pilip nêl vô i ên nêbê, “Lam loc wê lê.”
⁴⁷ Mêd Yesu yê wê Nataniel val vô i ge, om nêl lec i ên nêbê, “Wê, ge xomxo Islel nivîha ti, wê kiyang kityooên ti o yêp vac i nilô ge lêm.”
⁴⁸ Mêd Nataniel nêl vô Yesu ên nêbê, “Ông xovô a gê na?” Om Yesu nêl vô i ên nêbê, “Buc wê Pilip gên o keac ông lam lêm ge, ông le vac hîguc kehe di a xovô ông pyap.”
⁴⁹ Om Nataniel nêl ên nêbê, “Xolac kehe, ông ge Anutu nu. Ông tu xe Islel nêm xomxo levac.”
⁵⁰ Mêd Yesu nêl vô i ên nêbê, “Ông vông i vin ên wê a nêl vô ông ên a nêbê a xê ông le vac hîguc kehe ge. Lêc timuên ông obêc wê susu ya obêc luu tiga vêl.”
⁵¹ Mêd Yesu nêl hixôn ên nêbê, “A nêl hixôn nôn vô xam bê timuên xam obêc wê, lêc lag puunê obêc tax di angela wê Anutu vông ge ob lec mi la kisii di lop mi lôm vô Xomxo Nu.”

2

Yesu pilepac mia i tîyi xocbê wain gê Kena

¹ Buc yuu la vêl di buc wê vông yon ge xomxo vux ti ii vêx vac vîgwe Kena wê yêp vac vîgwe levac Galili ge, di Yesu ta la dô hixôn. ² Di he tyuc Yesu he nue ngivîhi ên nêb he i lam dô hixôn.
³ Mêd xomxo num wain ma vêl, om Yesu ta la nêl vô Yesu ên nêbê, “He xen wain ma.”
⁴ Lêc Yesu nêl vô i ên nêbê, “Tag, le i nêl vô a lêm. Ge

yêp vô a, ên buc wê a vông ge gên yêp.” ⁵ Mêd ta nêl vô nue yuac vihati ên nêbê, “Xam vông i tiyi kiyang wê Yesu ob nêl vô xam ge.”

⁶ Dêg ngidax vigê vilu di sec ti le, wê he mi lipac vigê hixôn susu ya vac tiyi mốp wê Yuda mi vông ge. Dêg tige levac mabu om dêg toto ge tiyi xocbê ob kilê mia vac dêg nipwo kehe ti, me kehe ti di vigê yuu mi too vac léc i pup lec. ⁷ Mêd Yesu nêl vô nue yuac tigeê ên nêbê, “Xam loc kilê mia di lam too vac dêg tigae di i pup lec.” Om he la kilê mia mi lam too vac dêg tigeê vihati mi i pup lec. ⁸ Mêd Yesu nêl vô he ên nêbê, “Xam ka mia vac dêg nipwo di kô mi loc vô xomxo levac ti wê viac yaên ge.” Om he ka di kô mi la vô xomxo levac tyo. ⁹ Mia tige pilepac wain pyap mêd xomxo levac wê viac yaên ge num lê léc o xovô kehe lêm. Nue yuac wê ka wain tige, he xovô, léc xomxo levac wê viac yaên ge lungên, om keac xomxo ti wê ii vêx ge lam ¹⁰ di nêl vô i ên nêbê, “Tibii vihati mi vông wain nyen vô xomxo tax mi he num. Di he obêc num levac ge od ob kô wain wê nyen maên ge mi vông vô he timuên. Di ông va lax wain nyen le, léc divông i lam timuên tya ga.”

¹¹ Do levac tige Yesu vông gê Kena wê yêp vac vigwe levac Galili ge. Ge do taxlee wê Yesu vông ge, om hilung xêseac yuu xêkizêc wê i vông ge di nue ngivihî yê di vông i vin. ¹² Pyap dêc Yesu he tae lie hixôn nue ngivihî he xôn la Kapaneam di la dô buc ya.

Yesu tii xomxo wê vông vitevac vac Anutu

*xumac ngibua ge la vêl**(Matyu 21:12-13; Mak 11:15-17; Luk 19:45-46)*

¹³ Buc levac Pasova wê he Yuda ob xovô buc Isip ilage vô kwabo lec, om Yesu la Jelusalem ¹⁴ di la vac Anutu xumac ngibua nilô, léc yê wê xomxo ya kô bwoc kau yuu sipsip di menac mi lam tung ên nêb tibii i kisuu di vông i tu daa ge, di yê wê xomxo ya dô di vông mone luuma ge. ¹⁵ Om Yesu hôm yihi viiên di tii xomxo tigeê hixôn bwoc kau yuu bwoc sipsip la vêl ên xumac ngibua, di kipyax mone wê he vông i luuma ge hixôn tevol la sea, ¹⁶ di nêl vô he wê vông vitevac lec menac ge ên nêbê, “Xam kô xam susu gee mi loc vêl, di le i léc vông Mag xumac i tu xochê vigwe maket lêm.” ¹⁷ Mêd Yesu nue ngivihî xovô lec kiyang ti wê yêp vac kipihac xolac bêga ên nêbê, “A vông yuac xêkizêc ta ên a nêb ông xumac i yêp nivîha.”

¹⁸ He Yuda yê môp wê Yesu vông ge om la nêl vô i ên nêbê, “Ông vông tibêge om ông ob vông do tina ên i nêl ông kitong vô xe?” ¹⁹ Yesu nêl vô he ên nêbê, “Xam obêc dii xumac ngibua tiga vêl ge od a ob lox vac i tiyi buc yon.” ²⁰ Om he kinêg vô Yesu ên nêbê, “Xumac ngibua tiga, xomxo vông yuac lec tiyi xochê klismas kehe yuu di vigê vilu di sec ti (46), léc ông nêl ên ông nêbê ông ob lox xumac tige vac i tiyi buc yon bed mê?” ²¹ Léc xumac ngibua wê Yesu nêl lec ge, ge nêl lec ici va ninivi, ²² om buc timuên wê Anutu tiyi vô Yesu kidi lec vac yibên ge, Yesu nue ngivihî xovô lec kiyang wê Yesu nêl lec xumac ngibua ge, om he vông i vin ên he nêbê kiyang wê Yesu nêl ge

hixôn kiyang wê yêp vac xolac ge, ge kiyang nôn vixôhilôg.

Yesu xovô xomxo vihati nilô

²³ Yesu dô Jelusalem vô buc Pasova wê he ob xovô buc Isip ilage, di xomxo tibeac yê do levac wê i vông ge om he vông i vin. ²⁴ Lêc Yesu o vô ninya lehe vô he mi la vac kiyang wê he nêl ge kwa ngibi lêm, ²⁵ ên xovô he vihati pyap, di o kinêg xomxo ngwe kehe vô xomxo ngwe lêm. Ên ici va xovô xomxo vihati nilô la tiyi pyap.

3

Yesu keac hixôn Nikodimas

¹ Xomxo ti dô lê nêbê Nikodimas. Nikodimas ge Palisi ti di i xomxo levac wê he Yuda vông ge. ² Lêc la vô Yesu vô bucên di nêl vô i ên nêbê, “Ông gexolac kehe, di xe xovô ên xe nêbê Anutu vông ông lam. Ên do levac wê ông mi vông ge Anutu obêc dô hixôn ông lêm ge od ông obêc vông do levac tibêge lêm.”

³ Mêd Yesu nêl vô i ên nêbê, “A nêl hixôn nôn vô ông bê xomxo ti obêc vô paha lec lêm ge od ob tu Anutu nu mi la dô vac i ben lêm.” ⁴ Lêc Nikodimas nêl vô i ên nêbê, “Xomxo wê vô levac pyap ge ob vô paha lec tibêna? Obêc lax vac ta nilô di yubac i tii vac, me?”

⁵ Lêc Yesu nêl vô i ên nêbê, “A nêl hixôn nôn vô ông bê xomxo ti obêc vô paha lec ya mia hixôn Myakilôhô Ngibua lêm ge od ob tu Anutu nu mi la dô vac i ben lêm. ⁶ Xomxo kibun ga kô nue kibun ga, dom Myakilôhô Ngibua obêc vông xomxo vô paha lec ge, od vông he tu Anutu nue.

⁷ Kiyang wê a nêl ên a nêbê xam vô paha lec ge, le i lêc yetac ên kiyang tige lêm. ⁸ Lea la vac vîgwe vîyang vîyang ge, lêc il ngô nididun pîleva dî kehe, il o xovô wê lam ge lêm, dî ob loc tina ge, il lungên. Dî môp wê Myakilôhô Ngîbua vông xomxo vô paha lec ge tîyi bêge.”

⁹ Mêd Nikodimas luu i vya dî kinêg ên nêbê, “Kiyang tige obêc vô nôn lec tibêna?”

¹⁰ Lêc Yesu nêl vô i ên nêbê, “Ông mi tîxuu lime Islel ya xolac, lêc bêna lêc ông lungên kiyang tige kehe? ¹¹ A nêl hixôn nôn vô ông bê xe nêl kiyang wê xe xovô ge dî xe nêl kitong lec susu wê xe mamnôn yê ge, lêc xam o vông i vin kiyang wê xe nêl ge lêm. ¹² A nêl kiyang tîxuuên lec susu kibun ga, lêc xam o vông i vin lêm. Om a obêc nêl kiyang lec susu kisii ganê ge od xam ob xovô tibêna? ¹³ Xomxo ti o lec mî la lag puunê lêm. Xomxo Nu tîbed wê lop mî lam gê lag puunê ge wê ob lec mî lax lag puunê tîi vac nang. ¹⁴ Ilage Moses tul myel kinu lec xax vac vîgwe mahîgun pîleva. Om Xomxo Nu, tibii obêc tul lec xax tîyi bêge êno, ¹⁵ dî xomxo vîhati wê vông i vin i ge, he ob dô mavîha luta lêc luta.”

¹⁶ Anutu xo vîgwe pîsiv ên xomxo kibun ga vîhati luu vêl om vông nu tuc tîbed lam, ên nêb xomxo obêc vông i vin i ge od he obêc yib mî la vac nîpâên lêm. Nge, he ob dô mavîha luta lêc luta. ¹⁷ Ên Anutu o vông nu tuc lam kibun ên nêb i lam vông myavîwen nîpâên vô xomxo lêm. Nge, vông i lam ên nêb i lam hôm he lec. ¹⁸ Xomxo wê vông i vin Anutu nu ge kiyang ti o yêp vô he lêm. Lêc xomxo wê o vông i vin

lêm ge he hîlu nêñ kiyang wê he ob yib mi la vac nipaên timuên ge, êñ he o vông i vin Anutu nu tuc nôñ tîbed ge lêm. ¹⁹ Myaviwen wê xomxo ob kô ge, kehe bêga nêbê Yesu kô xêseac mi lam kibun ga lê, lêc xomxo xêyaa vin lec mapitoc di he xona êñ xêseac, êñ môp wê he vông ge nipaên. ²⁰ Xomxo vihati wê vông môp nipaên ge, he xona êñ xêseac nêb he ob la vac lêm, êñ he nêb xêseac ob hîlung nipaên wê he vông ge lam le seac. ²¹ Di xomxo vihati wê vông môp bôbac ge he lam le vac xêseac, êñ nêb xêseac i nêl he kitong bê he vông yuac ya xêkizêc wê Anutu vông ge.

Jon Lipacên nêl Yesu kehe kitong

²² Pyap dêc Yesu he nue ngivihi la viğwe levac Judia di la dô di lipac xomxo ya. ²³ Jon êno lipac xomxo gê Inon wê yêp kwabo vô Selim ge, êñ mia levac yêp vac viğwe tige om xomxo la vô Jon di Jon lipac he, ²⁴ êñ Helot gên o tung Jon la vac kalabuhu lêm.

²⁵ Jon nue ngivihi hixôn Yuda ti ngaênma lec môp wê mia lipacên ge. ²⁶ Om Jon nue ngivihi la vô Jon di nêl vô i êñ nêbê, “Xolac kehe, xomxo ti wê dô hixôn ông ilage vô mia Jodan vilu ganê di ông nêl i kitong ge, xomxo vihati la vô xomxo tyo di i lipac he. Bêna lêc tyo vông tibêge?” ²⁷ Mêd Jon nêl lax vô he êñ nêbê, “Anutu lag puunê obêc vông nôñ ti vô xomxo ti lêm ge od o tîyi wê ob kô nôñ ti ge lêm. ²⁸ Xacxam va ngô kiyang wê a nêl vô xam ilage êñ a nêbê, ‘A o Kîlisi ti wê il dô bin ge lêm, lêc Anutu vông a lam mug Kîlisi môp.’” ²⁹ Xomxo ti obêc ii vêx ge od vêx tige ob tu ici va

vinê, léc li ngwe obêc dô di ngô li ngwe wê ob kô vêx tige vya ge od xêyaa obêc vô nivîha. Om gwêbaga, a tiyi xocbê lig ngwe ge, ên a xêgyaa vô nivîha yang ên Yesu. ³⁰ Om Yesu lê i vô levac di a lêg i vô nipwo lec.”

³¹ Xomxo ti wê lam gê lag puunê ge luu xomxo vihati vêl. Ên xomxo kibun ga, kehe yêp gê kibun om ob nêl kiyang lec susu kibun ga. Dom xomxo ti wê lam gê lag puunê ge nginoo susu vihati vêl.

³² Xomxo tige nêl kiyang lec susu wê yê di ngô pyap ge, léc xomxo ti o ngô di vông i vin kiyang wê nêl ge lêm. ³³ Léc xomxo wê ngô di vông i vin kiyang wê i nêl ge, vông vinên wê he vông ge nêl kitong nêbê Anutu ge xomxo kiyang nôn.

³⁴ Xomxo ti wê Anutu vông i lam ge, nêl Anutu kiyang, ên Anutu vông Myakilôhê Ngîbua hivun i xôn. ³⁵ Ma Anutu xêyaa vin lec nu tuc, om vông susu vihati vac i vigê. ³⁶ Xomxo ti obêc vông i vin Anutu nu ge od ob dô maviha luta léc luta, léc xomxo ti obêc hingoo nu tuc vya ge, od ob dô maviha luta lêm, ên xêyaa myavinê wê Anutu vông ge hivun i xôn pyap.

4

Yesu keac vô Samelia vêx ti

¹ He Palisi ngô kiyang wê nêb Yesu kô xomxo tibeac di lipac he luu wê Jon lipac ge vêl. ² Yesu o lipac xomxo ti lêm. Nge, nue ngîvihi môci lipac xomxo. ³ Mêd Yesu ngô wê he Palisi ngô kiyang tige, om sea vigwe levac Judia ên nêb ob lax mi la Galili, ⁴ mêd la vô môp Samelia, ⁵ di mila vigwe ti lê nêbê Saika wê yêp vac vigwe levac Samelia

ge. Vigwe tige yêp kwabo vô kibun ti wê Jekop vông vô nu Josep ilage. ⁶ Lôva ti wê Jekop yev ilage mi mia lua vac ge yêp vac vigwe tige om xomxo lam mi kilê. Yesu mîla, léc ni ma vêl lec môp dia wê lam ge om mîla dô kwabo vô mia tige. Ge tîyi xocbê hiyôv tyip kitôn.

⁷⁻⁸ Yesu vaci mîla dô đi nue ngivihî la mug mî la ên nêb ob la kisuu yaên, đi Samelia vêx ti val ên nêb ob kilê mia om Yesu nêl vô i ên nêbê, “Kilê mia mî lam ên a ob num.” ⁹ Léc vêx tyo nêl vô i ên nêbê, “Ông vux Yuda đi a vêx Samelia. Bêna léc ông kitaa mia vô a?” Nêl bêge, ên Yuda yuu Samelia o mî keac vôma lêm. ¹⁰ Mêd Yesu nêl vô i ên nêbê, “Ông obêc xovô vizid wê Anutu vông ge đi ông obêc xovô xomxo ti wê nêl vô ông ên nêbê ông vông mia mî i num ge od ông obêc kitaa mia vô i đi i vông mia maviha vô ông.” ¹¹ Léc vêx tyo nêl vô i ên nêbê, “Xomxo levac, ông nêm dêg ma, đi mia tô mî lax ngibi ganê, om ông ob kilê mia maviha tige gê na? ¹² Bug Jekop vông lôva tiga vô xe, đi i hixôn nue đi i bwoc, he xôn mî num vac, léc mêd ông luu Jekop vêlê?” ¹³ Léc Yesu nêl vô vêx Samelia tyo ên nêbê, “Xomxo vihati wê num mia tiga, he ob xo mia tii vac. ¹⁴ Léc xomxo ti obêc num mia wê a vông ge od ob xo mia bê ob num i tii vac lêm. Ma vêl. Ên mia wê a ob vông vô i ge obêc pîtuv vac i nilô đi vông i dô maviha luta léc luta.” ¹⁵ Om vêx tyo nêl vô i ên nêbê, “Xomxo levac, ông vông mia tige vô a mî a num êdêc a xoên mia tiga i ma đi a lam kilêên tii vacên i ma.”

¹⁶ Yesu nêl vô i ên nêbê, “Loc keac liyam đi muu xôn lôm.” ¹⁷ Léc vêx tige nêl ên nêbê, “A

liyang ma.” Mêd Yesu nêl vô i ên nêbê, “Ông nêl vixôhilôg ên ông nêbê ông liyam ma. ¹⁸ Ên ilage ông kô vux vigê vilu lêc sea he di vux wê dô hixôn ông gwêbaga ge, o ông liyam lêm. Om kiyang wê ông nêl ge, ông nêl nôn.” ¹⁹ Mêd vêx tyo nêl vô i ên nêbê, “Xomxo levac, ga a xovô ên a nêbê ông plopete ti. ²⁰ Xe buge lam mi kitaa vô Anutu lec kitôn tiga, lêcom xam Yuda nêl ên xam nêbê vigwe wê il ob kitaa vô Anutu ge, vigwe Jerusalem tived.”

²¹ Mêd Yesu nêl vô i ên nêbê, “Vêx, ông vông i vin kiyang wê a ob nêl ga bê timuên ge xam obêc kitaa vô Mag lec kitôn tiga lêm, di xam ob kitaa gê Jerusalem êno lêm. ²² Xam Samelia mi kitaa lê, lêc xam lungên xomxo wê xam mi kitaa vô i ge. Di xe Yuda, Anutu wê xe mi kitaa vô ge, xe xovô pyap, ên xomxo ti wê ob vô xomxo vêl ên nipaên ge lam vac xe Yuda. ²³ Buc ti obêc val, om gwêbaga buc tyo val pyap, om xomxo wê ob kitaa nôn ge, Myakilôhô Ngibua ob ngidu he xôn di he ob kitaa vô Mag hixôn kiyang nôn. Ên xomxo tibêgee wê Anutu xêyaa vin lec nêb he i kitaa vô i. ²⁴ Anutu ge Myakilôhô, om xomxo obêc nêb kitaa vô i ge od Myakilôhô Ngibua i ngidu he xôn di he i kitaa hixôn kiyang nôn.” ²⁵ Mêd vêx tyo nêl vô Yesu ên nêbê, “A xovô ên a nêbê Mesaia ti wê Anutu vino ge wê he nêl lê nêbê Kilisi ge obêc val. Di obêc val ge od ob nêl kiyang vihati kehe kitong vô il.” ²⁶ Yesu nêl vô i ên nêbê, “A tyo ga mê, wê a dinêl kiyang vô ông ga.”

²⁷ Yesu nêl kiyang tige, di nue ngivihi vena yê

wê Yesu dikeac hixôn vêx tige di he yetac ên. Lêc he ti o nêl vô i lêm bê “Ông ob kô vatya? Di ông keac vô vêx tige ên va?” ²⁸ Mêd vêx tige sea dêg le di lax mi la viyangtôv di lax nêl vô xomxo tibeac ên nêbê, ²⁹ “Xam lam loc wê xomxo ti wê nêl kiyang a vông ilage vihati kitong. Ganê mêd Kîlisi ti wê il dô bin ge yuubê?” ³⁰ Om he sea ben di lam vô Yesu.

³¹ He gên dilam di Yesu nue ngivihi nêl vô Yesu ên nêbê, “Xolac kehe, wa yaên lê.” ³² Lêc Yesu nêl vô he ên nêbê, “Yaên wê a vông ge dô, lêcom xam lungên.” ³³ Om nue ngivihi kinêg vômâ ên nêbê, “Mêd xomxo ti vông yaên vô i?” ³⁴ Lêc Yesu nêl vô he ên nêbê, “Yaên wê ob den a ge bêga bê a ob vông kiyang yuu yuac wê xomxo ti wê vông a lam ge nêb a vông ge i loc pyap lê. ³⁵ Xam nêl ên xam nêbê dentuc yuudiyuu obêc lam la vêl di xam ob la kô yaên nôn vac yuac. Lêc a ob nêl vô xam bê xam vêl mamnôn lec mi wê yuac, ên xomxo viac he pyap tiyi wê xam ob la nêl xolac vô he ge, tiyi xochê susu vô nôn vac yuac ge. ³⁶ Xomxo wê ob la kô nôn vac yuac ge ob kô nôn nivîha lec yuac wê he vông ge di ob kituc nôn tige la dô nivîha luta lêc luta. Om xomxo wê xin vê ge hixôn xomxo wê kô nôn ge, yuu xôn xêyaa vô nivîha. ³⁷ Om kiyang wê nêl ên nêbê xomxo ngwe ob xin vê di ngwe ob la kô nôn ge, kiyang nôn. ³⁸ A vông xam la ên a nêb xam kô nôn vac yuac wê xam o vông ilage lêm ge. Yuac wê xomxo mugên vông pyap ge, xam ob la kô nôn vac.”

³⁹ Tibii Samelia wê dô vac vigwe tige, he tibeac vông i vin Yesu ên wê vêx tige nêl ên nêbê, “Yesu

nêl kiyang wê a vông ilage vihati kitong.” ⁴⁰ Mêd tibii Samelia la vô Yesu di la kitaa i nêb i dô hixôn he, om Yesu dô hixôn he tiyi buc yuu, ⁴¹ di xomxo tibeac hiwocên ngô kiyang wê Yesu nêl ge om he vông i vin. ⁴² Mêd he nêl vô vêx tyo ên nêbê, “Xe o vông i vin lec ông vyam wê ông nêl ge lêm. Nge, xecxe va ngô i vya om xe xovô ên xe nêbê xomxo ti wê ob hêm xomxo kibun ga vihati lec ge, xomxo tyo tiga vixôhilôg nôn.”

Yesu vông xomxo levac ti nu vô nivaha lec

⁴³ Yesu dô vac vigwe tige buc yuu dêc sea di la Galili. ⁴⁴ Yesu vaci nêl ila ên nêbê plopete ti lie vac ici va ben ob kô i lec nivaha lêm. ⁴⁵ Mêd Yesu mila Galili, di tibii Galili hêm i lec nivaha, ên he êno la yê buc ngibua gê Jelusalem om he yê môp vihati wê Yesu vông vô buc tige.

⁴⁶ Mêd Yesu lax mi la Kena wê yêp vac vigwe levac Galili ge. Kena ge vigwe wê Yesu pilepac mia tu wain vac ilage. King nu hizap ti dô vac vigwe Kapaneam, léc nu vux ti, yidac vông.

⁴⁷ Mêd xomxo levac tyo ngô wê Yesu sea Judia di lam dô Galili ge, om la vô Yesu di la kitaa i ên nêb i loc Kapaneam ên loc vông i nu i vô nivaha lec, ên nu vô kwabo lec wê ob yib ge. ⁴⁸ Léc Yesu nêl vô xomxo levac tyo ên nêbê, “Xam wêên do levac obêc ma ge od xam nêb xam ob vông i vin lêm.” ⁴⁹ Mêd xomxo tyo nêl vô i ên nêbê, “Xomxo levac, lam lutibed ên a nug obêc yib.” ⁵⁰ Mêgem Yesu nêl vô i ên nêbê, “Ông lôc, ên ông num obêc vô nivaha lec.” Mêd xomxo tyo vông i vin kiyang wê Yesu nêl ge di lax. ⁵¹ Mila môp mahigun ti di nue yuac ya val nêl vô i ên nêbê, “Num vô

niviha lec.” ⁵² Mêd xomxo tyo kinêg vô he ên nêbê, “Yidac sea i lec hiyôv manôn tina?” Om he nêl ên nêbê, “Vihevage wê hiyôv kilê ge num ninivi vô ningigooên lec.” ⁵³ Mêd ma xovô nêbê hiyôv manôn tige wê Yesu nêl vô i nêbê nu vô niviha lec ge. Mêgem xomxo tige he vinê nue vihati vông i vin. ⁵⁴ Buc wê Yesu sea Judia di lax mi la Galili ge od vông do tiga wê vông yuu ge vac vigwe Galili.

5

Yesu vông xomxo ti vô niviha lec vac mia luaên Betesda

¹ Buc ya lam la vêl mêd buc levac wê Yuda vông ge ti vô kwabo lec om Yesu la Jerusalem. ² Jerusalem ge, mia luaên ti yêp kwabo vô bwoc sipsip vuayen. Mia luaên tige, Hiblu vya nêbê Betesda, di xumac nipwo vigê vilu le vô mia luaên tige ninya. ³ Xomxo yidac tibeac yêp vac xumac tige, ya manôn toc, di ya vixa vô nipaên di ya len vô xêlehe. [Xomxo tige dô bin buc wê mia obêc vô mahilevac ge, ⁴ ên buc ya Apumtau vông angela ti lam la vac mia nilô di vông mia vô mahilevac, di xomxo yidac ti obêc la vac mia wê vô mahilevac ge tax ge, od ninivi obêc vô niviha lec.]

⁵ Vux ti yêp vac xumac tige, lêc yidac vông i tiyi klismas kehe ti di vigê yuu di vixa vilu di sec yon (38). ⁶ Mêd Yesu yê xomxo tige wê diyêp ge di xovô nêbê yidac vông i tiyi klismas tibeac, om kinêg vô i ên nêbê, “Ông nêb ông nimnivi i vô niviha lec, me?”

⁷ Mêd xomxo tyo nêl vô i ên nêbê, “Xomxo levac, vô buc wê mia vô mahilevac ge od a lige wê ob vông a la vac mia ge ti o dô lêm, om a nêb a ob la vac mia lê, lêc xomxo le luu a vêl di la vac mia tax.” ⁸ Om Yesu nêl vô xomxo tyo ên nêbê, “Kidi lec mi kô ông guhu lec di loc.” ⁹ Mêd lutibed xomxo tyo ninivi vô nivîha lec di i kô i guhu lec di la.

Buc tige, buc wê sabat ge, ¹⁰ om he Yuda nêl vô xomxo ti wê Yesu vông i vô nivîha lec ge ên nêbê, “Gwêbaga buc sabat, di kiyang yêp bêga nêbê ông ob kilê guhu lec sabat lêm.” ¹¹ Lêc xomxo tyo nêl vô he ên nêbê, “Xomxo ti wê vông a vô nigvîha lec ge nêl vô a ên nêbê, ‘Hôm ông guhu lec di loc.’” ¹² Om he kinêg vô i ên nêbê, “Xomxo letya wê nêl vô ông ên nêbê ông hôm guhu lec di loc ge?” ¹³ Lêc xomxo tyo lungên, ên xomxo tibeac dô vac vîgwe tige di Yesu loc mi la vac he mahigun di la.

¹⁴ Nang di buc ngwe lêc Yesu mila tulec xomxo tyo vac Anutu xumac ngîbua om nêl vô ên nêbê, “Wê lê. Ông nimnivi vô nivîha lec. Om le i lêc vông nipaên ti i tii vac lêm, ên vîyin levac mabu obêc val vô ông i luu ilage vêl.” ¹⁵ Mêd xomxo tige lax mi la vô he Yuda di nêl ên nêbê, “Xomxo ti wê vông a vô nigvîha lec ge Yesu.”

¹⁶ Mêgem he Yuda nêb ob vông vîyin vô Yesu ên wê vông môt tige lec buc sabat ge. ¹⁷ Lêc Yesu nêl vô he ên nêbê, “Mag vông yuac lec buc vîhati, di a êno vông yuac bêge.” ¹⁸ Mêgem he Yuda yê Yesu xôn ên nêb ob hi i yib, ên wê vông sabat vô nipaên ge, lêc o sabat kiyang tîbed lêm. Nge,

Yesu nêl ên nêbê “Anutu ge a mag”, om Yuda yê i tiyi xochê yong i nêb yuu xôn Anutu tiyima.

Yesu nêl kiyang lec yuac wê ob vông ge

¹⁹ Mêgem Yesu nêl vô he Yuda ên nêbê, “A nêl vixôhilôg nôn vô xam bê a Anutu nu, a o tiyi wê a ob vông môt i tiyi xovôên wê aca va vông ge lêm. Nge, môt wê a vông ge a vông vihati tiyi môt wê Mag vông mi a xê ge. Môt wê Mag vông ge, a êno ob vông i tiyi. ²⁰ Ên Ma xêyaa vin lec nu tuc om hilung môt vihati wê i vông ge vô i, léc do levac wê luu môt tigeê vêl ge, Ma obêc hilung vô nu di i vông om xam obêc yetac mabu ên do wê i vông ge. ²¹ Mag vông xomxo kidi lec vac yibên di vông he dô maviha, di nu tuc obêc vông xomxo wê vînoo he ge i dô maviha bêge êno. ²² Di Mag ob yaxên xomxo ti nêl kiyang lêm. Nge, vô vac nu tuc viêgê ên nêb i yaxên xomxo vihati nêl kiyang. ²³ Ma vông bêge ên nêb xomxo vihati i pimil nu tuc lê i tiyi xochê he pimil Ma lê ge. Xomxo ti obêc pimil nu lêm ge od tiyi xochê o pimil Ma wê vông i lam ge lê lêm.

²⁴ “A nêl hixôn nôn vô xam bê xomxo wê ngô a kiyang di vông i vin xomxo ti wê vông a lam ge, xomxo tigeê ob dô maviha luta léc luta, di he ob tulec myaviwen nipaên ti lêm, ên Anutu xovô pyap nêb ob vô he vêl ên yibên di vông he dô maviha luta léc luta.

²⁵ “A nêl hixôn nôn vô xam bê buc ti obêc val om val gwêba pyap, mêgem xomxo wê dô vac môt mayibên ge he ob ngô Anutu nu vya, di he wê ngô ge ob dô maviha. ²⁶ Mag ge maviha kehe,

om vông maviha wê i vông ge vô nu tuc. ²⁷ Ma vinoa nu tuc pyap ên nêb i yaxên xomxo vihati nêb kiyang, ên i Xomxo Nu. ²⁸ Xam o léc yetac di nga vigêm ên kiyang tiga lêm. Ên buc ti obêc val, di tibii vihati wê yêp vac lôva ge obêc ngô i vya ²⁹ di kidi mi lam, om he wê vông môm nivîha ge obêc kidi lec mi dô maviha, di he wê vông nipaên ge obêc kidi lec di kô myaviwen nipaên.”

Yesu nêl i kitong nêb i Anutu nu

³⁰ “A o tiyi wê a ob vông môm ti ya xovôên wê aca va vông ge lêm. Nge, a yaxên xomxo nêb kiyang tiyi xocbê kiyang wê a ngô vô Mag ge. Di a yaxên xomxo nêb kiyang ya môm bôbac, ên a o timu vô piyôp wê a vông ge lêm. Nge, xomxo ti wê vông a lam ge, a timu vô kiyang wê i vông ge.

³¹ “Aca va obêc nêl a kehe kitong ge od obêc tiyi lêm. ³² Léc xomxo ti wê nêl a kehe kitong ge dô, di a xovô ên a nêbê kiyang wê xomxo tige nêl lec a ge kiyang nôb.

³³ “Xam Yuda, xam vông xomxo la vô Jon ilage, di Jon nêl kiyang nôb kehe kitong. ³⁴ A o xo ên a nêb xomxo kibun ga i nêl a kehe kitong lêm. Léc a nêb Anutu i vô xam vêl om a nêl kiyang tiga kitong vô xam. ³⁵ Jon ge tiyi xocbê ngwax wê linac xêseac vô xam ge, om xam xêmyaa vô nivîha di xam dô vac xêseac wê i vông ge myabo tya. ³⁶ Di gwêbaga a lam vông yuac om yuac tige nêl a kehe kitong luu kiyang wê Jon nêl ge vêl. Ên a lam vông yuac wê Mag nêb a vông ge, om yuac tige nêl a kehe kitong nêbê Mag vông a lam. ³⁷ Di Mag wê vông a lam ge, nêl a kehe kitong hixôn.

Xam o ngô i vya lêm di xam o wê i nôn lêm, ³⁸ di kiyang wê i vông ge o yêp vac xam nilôm lêm, ên Mag vông a lam, léc xam o vông i vin a lêm. ³⁹ Kiyang wê yêp vac kipihac xolac ge, xam mi kitong ên xam xo ên xam nêbê maviha kehe luta yêp vac kiyang tige. Di xolac tige wê nêl a kehe kitong, ⁴⁰ léc xam nêb xam ob lam vô a êdêc dô mamviha lêm.

⁴¹ “A o lam ên a nêb xomxo i vông lê levac vô a lêm. ⁴² Léc a xovô ên a nêbê xam xêmyaa o vin lec Anutu lêm. ⁴³ A tu Mag manôn mi lam vô xam, léc xam o kô a lec nivîha lêm. Di xomxo ti obêc lam vô xam lec ici va lê ge od xam kô i lec nivîha. ⁴⁴ Xam kô lêm levac vô lime vaci, di lê levac wê Anutu tived ob vông vô xomxo ge, xam nêb xam ob kô lêm. Om xam obêc vông i vin tibêna? ⁴⁵ Xam o léc xo bê a ob vông kiyang vô xam vô Anutu manôn lêm. Xomxo wê ob vông kiyang vô xam ge, Moses ti wê xam vông i vin ên xam nêbê obêc ngidu xam xôn ge. ⁴⁶ Xam obêc vông i vin kiyang wê Moses vông ge od xam obêc vông i vin kiyang wê a vông ge hixôn, ên Moses ge wê kivuu kiyang lec a. ⁴⁷ Léc xam o vông i vin kiyang wê Moses kivuu ge lêm, om xam obêc vông i vin kiyang wê a nêl ge tibêna?”

6

*Yesu vet xomxo 5,000
(Matyu 14:13-21; Mak 6:30-44; Luk 9:10-17)*

¹ Yesu nêl kiyang tige vêl di tô mi sox la mia Galili vilu ganê. Mia tige lê ngwe nêbê Taibilias.
² Mêd xomxo tibeac hiwocên timu vô Yesu vixa mi la, ên he yê do levac wê Yesu vông xomxo

yidac vô nivîha lec ge. ³ Mêd Yesu he nue ngivîhi lec kitôn ti mi la dô lec. ⁴ Mêd buc ngîbua wê Yuda ob yê Pasova ên xovô buc wê he sea Isip ilage vô kwabo lec. ⁵ Lêc Yesu yê xomxo tibeac val om nêl vô Pilip ên nêbê, “Il ob kîsuu blet gê na mi vet xomxo tigae ya?” ⁶ Yesu xovô môp wê nêb ob vông ge pyap, lêc nêl kiyang tige vô Pilip ên nêb ob yaxên i.

⁷ Mêd Pilip nêl vô i ên nêbê, “Il obêc kîsuu blet lec mone yul yuu (K200) mi vông nipwo tyatya vô he ge od yaên tige obêc tiyi he vihati lêm.” ⁸ Mêd nue ngivîhi ngwe lê nêbê Andlu, wê Saimon Pita li ge

nêl ên nêbê, ⁹ “A xê xomxo nipwo ti wê kô blet vigê vilu di beac yuu, lêc yaên tige o tiyi xomxo tibeac tigae lêm.” ¹⁰ Mêd Yesu nêl ên nêbê, “Xam vông xomxo vihati i tô mi dô kibun lê.” Vigwe tige hisinac nivîha dô om he dô kibun lec. Xomxo tige tibeac hiwocên om vux vaci tiyi xocbê 5,000.

¹¹ He dô kibun pyap mêd Yesu hêm blet tige di kitaa lec mêd titang vô xomxo vihati. Nang dêc vông bêge vô beac hixôn, mêd xomxo vihati ya di i den he. ¹² He ya pyap, mêd Yesu nêl vô nue ngivîhi ên nêbê, “Xam vilu myapîpu wê he ya di i dô gee mi tung i dô kidu ti, ên ti i o loc dô sea lêm.” ¹³ Mêgem he kituc myapîpu wê xomxo ya di i dô gee mi su vac sepac vigê yuu di tô mi la yuu mi i pup lec.

¹⁴ Xomxo tige yê do levac wê Yesu vông ge om nêl ên nêbê, “Plopet ti wê he nêb ob lam kibun ge, tyo tiga vixôhîlôg nôn.” ¹⁵ Mêd Yesu xovô wê

he nêb he ob hêm i xôn di vông i tu he nêb king ge, om sea he di ici va lax mi la lec kitôn.

*Yesu la lec mia luaên kisii
(Matyu 14:22-33; Mak 6:45-52)*

¹⁶ Vigwe huc di Yesu nue ngivihi lop mi la mia luaên ninya, ¹⁷ di lec la lec dipac ti di la, ên nêb ob lax mi la Kapaneam wê yêp mia luaên vilu ganê. Di vigwe buc léc Yesu o mila vô he decdec lêm. ¹⁸ Mêd lea levac ti val om vông mia vô mahilevac xocbê ob kipyax he vac, ¹⁹ om he hisoo mia mi la mahigun dia tya tyyi xocbê 5 kilomita ge, léc he yê wê Yesu lam lec mia kisii mi val kwabo vô dipac ge om he xonamabu. ²⁰ Léc Yesu nêl vô he ên nêbê, “Ga a, om xam xona ên i ma.” ²¹ Mêd he nêl vô Yesu ên nêb i lec lam lec dipac, di lutibed dipac mila le kehe vô vigwe ti wê he nêb he ob la ge.

Xomxo tibeac myag Yesu

²² Vigwe vidiiên titige, xomxo tibeac gên dô vô mia luaên ninya vilu ganê di dô bin Yesu, ên he xovô ên he nêbê dipac tibeac sea vigwe tige vihevage di la, di Yesu nue ngivihi heche va la lec dipac tige di Yesu o la hixôn he lêm. ²³ Mêd dipac mangwe lam gê vigwe Taibilias di lam le vô vigwe ti wê Apumtau Yesu kitaa lec blet mi xomxo ya vihevage. ²⁴ Mêd xomxo tige yê léc Yesu he nue ngivihi o dô lêm om he la lec dipac ti di la ên nêb ob la myag Yesu gê Kapaneam.

Yesu ge yaên wê ob vông xomxo dô maviha

²⁵ Xomxo tige mila yêvô Yesu gê mia luaên vilu ganê di kinêg vô i ên nêbê, “Xolac kehe, ông

lam ga yelacna?” ²⁶ Lêc Yesu nêl vô he ên nêbê, “A nêl hixôn nôn vô xam bê xam myag a, lêc xam o xovô do levac wê a vông ge lêc lam myag a lêm. Nge, xam xovô blet wê xam wa i den xam ge om xam lam myag a. ²⁷ Le i lêc vông yuac levac ên yaên wê ob vô nipaên ge lêm. Nge, xam vông yuac lec yaên wê xam ob kê di dô mamviha luta ya ge. Yaên tige, a, Xomxo Nu, a obêc vông vô xam, ên Mag Anutu vînoo a pyap ên nêb a vông i yuac.”

²⁸ Om he nêl vô i ên nêbê, “Xe ob vông Anutu yuac ga tibêna?” ²⁹ Om Yesu luu he vya bêga nêbê, “Yuac wê Anutu vông ge bêga bê xam vông i vin xomxo ti wê Anutu vông i lam ge.”

³⁰⁻³¹ Mêd he kinêg vô i ên nêbê, “Om ông ob vông do levac tina ên xe xê di vông i vinê? Ên buge ilage ya yaên mana vac vîgwe mahigun pileva, tiyi xocbê kiyang wê yêp vac xolac bêga nêbê, ‘Ici va vông yaên lag puunê vô he mi he ya.’ Om ông ob vông do levac tibêge, me?” ³² Lêc Yesu nêl vô he ên nêbê, “A nêl vixôhilôg nôn vô xam bê Moses o vông yaên lag puunê vô xam lêm. Nge, Mag vaci wê vông yaên nôn lag puunê vô xam ge. ³³ Yaên wê Anutu vông ge, lam gê lag puunê di lam vông xomxo kibun ga dô maviha.”

³⁴ Om he nêl vô i ên nêbê, “Xomxo levac, ông vông yaên tige vô xe i tiyi buc vihati ên va.”

³⁵ Om Yesu nêl vô he ên nêbê, “Aca va ga, a yaên wê ob vông xomxo dô maviha ge. Xomxo ti obêc lam vô a ge od vip obêc den i tii vac nang lêm, di xomxo ti obêc vông i vin a ge od obêc xo mia ti i tii vac lêm. ³⁶ A nêl gwêba vô xam ên

a nêbê xam wê a pyap lê, lêc xam o vông i vin lêm. ³⁷ Xomxo wê Anutu vînoo nêb he i tu axe ge, vîhati obêc lam vô a, di xomxo ti obêc val vô a ge, od a obêc tii i lêm. ³⁸ Ên a o lop mi lam gê lag puunê ên a nêb a ob vông i tiyi xovôên wê aca va vông ge lêm. Nge, a lam ên a nêb a ob timu vô kiyang wê xomxo ti wê vông a lam ge nêl ge. ³⁹ Xomxo ti wê vông a lam ge nêb a o lêc sea xomxo wê i vînoo nêb he i tu axe ge ti i dô xel lêm. Nge, nêb a lêc tîpi vô he vîhati i kidi lec vô buc timuên. ⁴⁰ Ên Mag nêl kiyang yêp bêga nêbê xomxo wê yê nu tuc di vông i vin ge, he vîhati obêc dô maviha luta lêc luta, di a obêc tîpi vô he kidi lec vô buc timuên.”

⁴¹ Mêd he Yuda ngô kiyang wê Yesu nêl ên nêbê, “Aca va yaên wê a lop mi lam gê lag puunê,” om he kunac i di nêl kiyang ni nyagên lec i ⁴² di nêl ên nêbê, “Xomxo tige Yesu wê Josep nu ge, di ta yuu ma il xovô. Bêna lêc nêl ên nêbê i lam gê lag puunê?”

⁴³ Lêc Yesu nêl vô he ên nêbê, “Le i lêc ngaênma lec a lêm. ⁴⁴ Ên xomxo ti o tiyi wê ici va ob lam timu vô a ge lêm. Mag wê vông a lam ge obêc didii xomxo ti ge od obêc lam timu vô a, di a obêc tîpi vô i kidi lec vô buc timuên. ⁴⁵ Kiyang yêp vac kîpihac wê plopete kîvuu ilage bêga nêbê, ‘Anutu ob tixuu xomxo vîhati.’ Om xomxo vîhati wê ngô Mag kiyang di kô xovôên vô i ge ob lam vô a. ⁴⁶ Ên xomxo ti o yê Mag lec manôn lêm. Nge, a wê a lam vô Anutu ge a tîbed wê a xê i. ⁴⁷ A nêl hixôn nôn vô xam bê xomxo wê vông i vin ge obêc dô maviha luta lêc

luta. ⁴⁸ A ga, yaên wê ob vông xomxo dô maviha luta. ⁴⁹ Bume ilage wê ya yaên mana vac vigwe mahigun pileva ilage, he ya léc yib. ⁵⁰ Léc yaên wê lam gê lag puunê ge, xomxo ti obêc ya ge od ob yib lêm. ⁵¹ A ga yaên maviha wê a lop mi lam gê lag puunê. Om xomxo ti obêc ya yaên tiga ge od ob dô maviha luta léc luta. Yaên wê a ob vông vô i ge, aca va liyôhô wê a ob vông, ên xomxo kibun ga i dô maviha.”

⁵² Mêgem Yuda ngaênma lec kiyang tige di nêl vông ên nêbê, “Xomxo tige obêc vông i liyôhô mi il xa tibêna?”

⁵³ Om Yesu nêl vô he ên nêbê, “A nêl hixôn nô nôm vô xam bêga bê xam obêc wa a, Xomxo Nu, liyôhô di num a hi lêm ge od xam ob dô maviha lêm. ⁵⁴ Xomxo wê ya a liyôhô di num a hi ge, he ob dô maviha luta léc luta, di a obêc tipî vô he kidi lec maviha vô buc timuên. ⁵⁵ Ên a liyôhô tu yaên nô nôm, di a hi tu mia numên nô nôm. ⁵⁶ Xomxo wê ya a liyôhô di num a hi ge, he ob dô vac a nilôg di a ob dô vac he nilô. ⁵⁷ Mag maviha vông a lam, di a dô magviha ya xêkizêc wê Mag vông ge. Om xomxo ti obêc ya a ge, od ob dô maviha ya xêkizêc wê a vông ge. ⁵⁸ Tiga, yaên wê lam gê lag puunê ge, léc o tiyi xocbê yaên wê bume ya ila ila léc yib ge lêm. Nge, yaên tiga wê xomxo obêc ya ge od ob dô maviha luta léc luta.” ⁵⁹ Yesu nêl kiyang tige vô xomxo vac Yuda xumac lilo gê Kapaneam.

Yesu ge kiyang maviha dôên kehe

⁶⁰ Xomxo wê mi la hixôn Yesu gee he tibeac ngô kiyang tige wê Yesu nêl ge, om he nêl ên

nêbê, “Kiyang tiga viyin levac, om letya tiyi wê ob ngô ge?” ⁶¹ Yesu xovô wê he nêl kiyang tibeac tibeac lec tige om nêl vô he ên nêbê, “Kiyang tige juda xam, me? ⁶² Xam obêc wê Xomxo Nu lax mi la vac vigwe ti wê dô vac ilage ge od xam obêc xo bêna? ⁶³ Myakilôhô Ngibua tibeac wê ob vông xomxo dô maviha, di xêkizêc wê xomxo vông ge ti o tiyi lêm. Kiyang wê a nêl vô xam ga ge, a nêl lec Myakilôhô Ngibua wê ob vông xomxo dô maviha ge. ⁶⁴ Lêc xam ya o vông i vin lêm.” Yesu nêl bêge, ên ilage Yesu xovô xomxo wê vông vinên obêc ma ge, di xovô xomxo tya wê ob vông i vac tibii vevac vigê ge pyap. ⁶⁵ Mêd Yesu nêl ên nêbê, “Kiyang yêp bêge, om a nêl gwêba vô xam ên a nêbê xomxo ti o tiyi wê ici va ob lam timu vô a ge lêm. Mag obêc vông xêkizêc vô i ge od obêc lam vô a.”

⁶⁶ Yesu nêl kiyang tige pyap mêd xomxo wê mi dô hixôn i ge tibeac sea i di o dô hixôn i tii vac nang lêm. ⁶⁷ Om Yesu kinêg vô nue ngivihi vigê yuu di tô mi la yuu ên nêbê, “Di xacxam va ob sea a êno di la mê?” ⁶⁸ Lêc Saimon Pita nêl vô i ên nêbê, “Apumtau, xe ob la vô letya? Ên kiyang wê ông vông ge wê ob vông xomxo dô maviha luta lêc luta. ⁶⁹ Om xe vông i vin di xovô ên xe nêbê ông ge xomxo ngibua wê Anutu vông ông lam ge.”

⁷⁰ Mêd Yesu nêl vô he ên nêbê, “A vînoo xam vigê yuu di tô mi la yuu, lêcom xam ti tu Seten xe.” ⁷¹ Yesu nêl kiyang tige lec Judas wê Saimon Iskaliot nu ge. Ên Judas ge he vigê yuu di tô mi la yuu ge ti, wê ob nêl Yesu kitong vô tibii vevac ge.

7

Yesu lie o vông i vin i lêm

¹ Pyap dêc Yesu la vilee vac vigwe levac Galili. Ên he Yuda wê dô Judia ge nêb ob hi Yesu i yib om Yesu nêb ob la vilee vac vigwe Judia lêm. ² Mêd Yuda buc ngibua ti wê he nêb ob xovô buc wê xumac sel ge vô kwabo lec, ³ om Yesu lie so vya vô i ên nêbê, “Sea vigwe ga di loc Judia, ên nume i yê yuac wê ông mi vông ge hixôn. ⁴ Ên xomxo ti obêc nêb xomxo i xovô i ge od ob vông yuac xôpacên lêm. Om yuac wê ông mi vông ge, ông loc vông vô he manôn ên he tibeac i yê di xovô.” ⁵ He ge Yesu lie, lêc he o vông i vin i lêm om he nêl kiyang tibêge. ⁶ Mêd Yesu nêl vô he ên nêbê, “A buc gên o vô kwabo lec lêm, dom xam ge, xam tiyi wê xam ob la tiyi buc vihati ge. ⁷ Xomxo kibun ga xêyaa ob vô myavinê vô xam lêm. Lêc he xêyaa vô myavinê vô a ên wê a nêl he nêl nipaên kitong ge. ⁸ Om xacxam va loc wê buc ngibua tige, ên a ob loc hixôn xam lêm, ên buc wê a vông ge gên o vô kwabo lec lêm.” ⁹ Yesu nêl kiyang bêge vô he di dô Galili.

Yesu la yê buc levac gê Jerusalem

¹⁰ Yesu lie la mug mi la yê buc levac, di Yesu vaci timu vô he vixa. Lêc o la seac vô xomxo manôn lêm. Nge, xôpac ên he mi la. ¹¹ Lêc he Yuda myag Yesu vô buc tige om he kinêg ên nêbê, “Xomxo tyo dô tina?” ¹² Xomxo wê dô gee he keac kiyang tibeac lec Yesu, om he ya nêl ên nêbê, “Ge xomxo nivîha ti,” di he ya nêl ên nêbê, “O xomxo nivîha lêm, ên mi kityoo xomxo.” ¹³ Lêc xomxo ti

o nêl kiyang tige seac mi xomxo tibeac ngô lêm, ên he xona ên Yuda levac.

¹⁴ Mila vô buc levac tige mahigun di Yesu la vac Anutu xumac ngibua di la nêl xolac vô xomxo. ¹⁵ He Yuda levac wê dô gee ngô Yesu kiyang di yetac mabu om nêl ên nêbê, “Xomxo tige xovô xolac tige tibêna? Ên xomxo ti o tixuu i lêm.” ¹⁶ Lêc Yesu luu he vya ên nêbê, “Kiyang wê a nêl ga, o a kiyang lêm. Nge, xomxo ti wê vông a lam ge, i kiyang. ¹⁷ Xomxo ti obêc xovô nêb ob timu vô kiyang wê Anutu vông ge od ob xovô kiyang wê a nêl ga kehe bê a nêl Anutu kiyang me a nêl aca va kiyang. ¹⁸ Ên xomxo ti obêc nêl ici va kiyang ge od xovô nêb ob vông ici va lê i vô levac. Lêc xomxo ti obêc vông xomxo ti wê vông i lam ge lê i vô levac ge od i xomxo kiyang nôn di kiyang kityooên ti o yêp vac i nilô lêm.

¹⁹ “Moses vông xolac vô xam ilage, lêc xam ti o timu vô xolac vihati lêm. Bêna lêc xam nêb xam ob hi a xibê?” ²⁰ Mêd xomxo tige nêl vô i ên nêbê, “Letya nêb ob hi ôngê? Mêd vimwo nipaên ti dô vac ông nilôm om ông nêl kiyang tibêge.” ²¹ Lêc Yesu nêl vô he ên nêbê, “Xam nga vigêm ên do levac tibeac wê a vông lec sabbat mi xam wê ge. ²² Om xam ngô lê. Moses nêl vô bume ilage ên nêb he i gôl nue vux ninivi. Vixôhilôg, môt tige kehe o yêp vô Moses lêm. Nge, yêp vô tivame vaci. Lêc xam mi gôl nume ninivi lec sabbat. ²³ Xam nêb xam ob timu vô Moses xolac om xam mi gôl nume ninivi lec sabbat. Bêna lêc xam kunac a ên wê a vông xomxo ti ninivi vô nivaha lec vô sabbat ge? ²⁴ Le

i léc yaxên xomxo nêñ kiyang vaxvax lêm. Nge, xam hivip kiyang kehe lec di titô i yêp bôbac.”

Xomxo kinêg nêb ob xovô Yesu kehe

²⁵ Xomxo Jelusalem ya kinêg êñ nêbê, “Xomxo ti wê he Yuda levac nêb ob hi i yib ge, tyo tiganê, me? ²⁶ Wê lê. Xomxo tyo nêl kiyang seac vac xomxo mahigun lê, léc xomxo levac o nêl kiyang ti vô i lêm. Mêd he xo êñ he nêb ge Kîlisi tyo, me? ²⁷ Léc xomxo tyo, il xovô i ben kehe, di Kîlisi wê ob val ge, il ob xovô ben kehe wê ob val vac ge lêm.”

²⁸ Om Yesu nêl xolac vac Anutu xumac ngîbua di keac levac hixôn êñ nêbê, “Xam nêb xam xovô a, di xam xovô a bog kehe hixôn, me? Êñ a o lam ya xovôên wê a vông ge lêm. Xomxo ti wê vông a lam ge, i xomxo kiyang nôn. Xam ge xam lungên i, ²⁹ di a ga, a xovô i pyap, êñ a dô hixôn i di i vông a lam.” ³⁰ Mêgem xomxo tigeê nêb ob hôm Yesu xôn, léc Yesu buc gên o vô kwabo lec lêm, om xomxo ti o tiyi wê ob hôm vigê lec i ge lêm. ³¹ Lêcom xomxo tibeac vông i vin nêbê Yesu ge Kîlisi om he nêl êñ nêbê, “Il nêd Kîlisi obêc val ge od ob vông do levac luu do levac wê Yesu vông ge vêl lêm. Om Yesu ge Kîlisi tyo mê.”

He vông xêhipu la vô Yesu êñ nêb he i loc hôm i xôn

³² He Palisi ngô wê xomxo nêl kiyang tibêge lec Yesu ge, om xomxo levac wê mi si daa gee hixôn he Palisi, he vông xêhipu ya la vô Yesu êñ nêb he i loc hôm Yesu xôn. ³³ Léc Yesu nêl vô he êñ nêbê, “A ob dô hixôn xam myabo tya, di a obêc lax mi la vô xomxo ti wê vông a lam ge.

34 Xam obêc myag a, lêc xam wêvôên a obêc ma, di vigwe wê a ob la dô vac ge, xam ti ob la vac lêm.” 35 Mêd he Yuda levac nêl voma ên nêbê, “Xomxo tyo nêb ob la na, lêc il xêên obêc ma? Mêd ob la vô Yuda wê la dô Glik ben ge ên nêl xolac vô he Glik, me? 36 Xomxo tyo nêl ên nêbê il ob myag i, lêc il xêvôên obêc ma, di vigwe wê ob la dô vac ge, il ob la vac lêm. Om kiyang tige kehe tibêna?”

Kiyang lec mia maviha

37 Buc levac tige mîla vô myahîpu wê ob tiyôô vac ge di buc tige buc levac wê luu baba vêl ge, om Yesu kidi lec vac he mahîgun di keac vya levac ên nêbê, “Xomxo ti obêc nêb num mia ge, od i lam vô a lê, ên a obêc vông mia mi i num. 38 Tiyi xochê kiyang wê yêp vac xolac bêga nêbê, ‘Xomxo ti obêc vông i vin a ge od mia maviha obêc lam vac i nilô di lop mi la.’” 39 Yesu nêl kiyang tige lec Myakilôhê Ngîbua wê ob val vô he wê vông i vin Yesu ge. Lêc buc wê Yesu nêl kiyang tige, Myakilôhê Ngîbua valên gên ma, ên Yesu gên o lax mi la dô vac xêseac lag puunê lêm.

Xomxo hîbu he la yuu lec Yesu

40 Xomxo ngô kiyang tige di ya nêl ên nêbê, “Xomxo tiga, plopet ti wê il dô bin ge vixôhilôg.” 41 Di he ya nêl ên nêbê, “Ge Kîlisi.” Lêc he ya nêl ên nêbê, “Kîlisi ob lam gê Galili lêm. 42 Ên kiyang yêp vac xolac bêga nêbê Kîlisi kehe yêp vac Devit om obêc lam gê Betlehem vac Devit ben.” 43 Mêgem xomxo tige hîbu he la yuu lec

Yesu, ⁴⁴ di he ya nêb ob hôm i xôn, léc xomxo ti o hôm vigê lec i lêm.

Xomxo levac wê Yuda vông ge o vông i vin Yesu lêm

⁴⁵ Mêd xêhipue lax mi la vô xomxo levac wê mi si daa gee hixôn he Palisi, di he kinêg vô xêhipue ên nêbê, “Bêna léc xam o kô i mi lamê?” ⁴⁶ Léc xêhipue nêl vô he ên nêbê, “Kiyang wê xomxo tyo mi nêl ge, xomxo ti o nêl kiyang tibêge ila lêm.” ⁴⁷ Om he Palisi nêl vô he ên nêbê, “Xomxo ge kityoo xam êno. ⁴⁸ Xomxo levac gae hixôn xe Palisi, xe ti o vông i vin xomxo tyo lêm. Ma vêl. ⁴⁹ Di xomxo tibeac wê ngô Yesu vya ge, he o vyac xovô Moses xolac lêm, om he vô nipaên pyap.”

⁵⁰ Léc Palisi ti lê nêbê Nikodimas wê la vô Yesu ilage dô hixôn he, om nêl vô lie Palisi ên nêbê, ⁵¹ “O tiyi wê il ob vông kiyang vô xomxo ti vaxvax ge lêm. Ên xolac wê il vông ge nêl ên nêbê il ob ngô xomxo nêl kiyang mi xovô môp wê i vông ge pyap tax lê.” ⁵² Léc he so vya vô i ên nêbê, “Ông ge tibii Galili ti om ông ngidu i xônê? Ông obêc kitong xolac wê yêp vac kipihac ge od ông ob xovô bê plopet ti ob lam gê Galili lêm.” ⁵³ [Pyap dêc he vîhati sea di toto ge la ben.

8

He kô vêx yôdac ti mi la vô Yesu

¹ Mêd Yesu lec mi la lec kitôn Oliv, ² di vigwe vidiiên titige lax mi la vac Anutu xumac ngibua. Mêd xomxo tibeac kituc la vô i om Yesu dô di vông xolac vô he. ³ Mêd xomxo wê xovô Moses xolac gee hixôn he Palisi, he yê vêx ti wê vông

yôdac ge om kô vêx tyo mi la lax vac he mahigun. ⁴ Mêd he nêl vô Yesu ên nêbê, “Xolac kehe, vêx tiga vông môm yôdac mi xe xê. ⁵ Moses nêl vac xolac ên nêbê vêx tibêga, xomxo ob hi ya ngidax ên i yib. Om ông ob nêl bêna lec i?” ⁶ He nêl bêge, nêb ob yaxên Yesu bêc obêc nêl kiyang ti so ge od he ob vông kiyang vô i. Lêc Yesu yu kwa vac di so kibun ya vigê liyih.

⁷ Mêd he kinêg tii vac vac vô Yesu, om Yesu kidi mi le kisii di nêl vô he ên nêbê, “Xomxo ti vac xam mahigun wê xovô nêb nipaên ti o yêp vô i lêm ge od i hôm ngidax mi nêx vêx tiga ya taxlee.” ⁸ Mêd Yesu yu kwa vac di so kibun tii vac. ⁹ Xomxo tigeê ngô kiyang wê Yesu nêl ge di xovô nêb nipaên om ti ti le lop mi la vixun. He levac la mug di he ba lop mi timu vô he vixa, di Yesu vaci hixôn vêx tyo wê yuu xeedô. ¹⁰ Mêd Yesu kidi mi le kisii di nêl vô vêx tyo ên nêbê, “Vêx, xomxo tigae la na? Ti dô wê ob vông kiyang vô ông ge, me?” ¹¹ Lêc vêx tyo nêl vô i ên nêbê, “Xomxo levac, ti dôên ma.” Om Yesu nêl vô i ên nêbê, “Om a êno, a ob vông kiyang vô ông lêm. Ông loc, di le i lêc vông nipaên ti i tii vac lêm.”]

Yesu ge xêseac wê ob linac vô xomxo gê kibun

¹² Yesu nêl vô xomxo tigeê tii vac ên nêbê, “A xêseac wê linac lec kibun. Xomxo ti obêc timu vô a ge, od ob la vac mapitoc lêm. Nge, ob dô vac xêseac wê ob vông i vô paha lec di vông i dô maviha ge.” ¹³ Om Palisi nêl vô i ên nêbê, “Ôcông va nêl ông kehe kitong om kiyang wê ông nêl ge o tiyi lêm.” ¹⁴ Mêlêc Yesu nêl vô he ên nêbê, “Vixôhilôg, aca va nêl a kehe kitong,

lêc kiyang wê a nêl ga, ge kiyang nôl, ên a xovô vigwe kehe wê a lam vac ge, di a xovô vigwe wê a ob lax mi la vac ge. Di xam ge, xam o xovô a bog kehe wê a lam vac ge lêm, di xam o xovô vigwe ti wê a ob lax vac ge lêm. ¹⁵ Xam yaxên xomxo nêl kiyang ya xovôên wê xacxam vông ge, di a ga, a o yaxên xomxo ti nêl kiyang lêm. ¹⁶ Lêc a obêc nêb yaxên xomxo ti nêl kiyang ge od a ob yaxên i nêl kiyang ya môp bôbac, ên o aca va wê a ob yaxên xomxo nêl kiyang ge lêm. Nge, Mag wê vông a lam ge dô hixôn a. ¹⁷ Kiyang ti yêp vac xolac wê xam vông ge bêga nêbê xomxo yuu obêc nêl kiyang tiyima lec kiyang tived ge od kiyang wê yuu nêl ge kiyang nôl. ¹⁸ A nêl a kehe kitong di Mag wê vông a lam ge nêl a kehe kitong hixôn.”

¹⁹ Mêd he kinêg vô Yesu ên nêbê, “Mam dô gê na?” Lêc Yesu nêl vô he ên nêbê, “Xam lungên a di xam lungên Mag êno. Xam obêc xovô a ge od xam obêc xovô Mag hixôn.” ²⁰ Yesu nêl xolac vô xomxo vac Anutu xumac ngibua, vac nilô ti wê he tung mone daa vac ge, om nêl kiyang tige hixôn vô he. Lêc xomxo ti o hôm i xôn lêm, ên buc wê i vông ge o vô kwabo lec lêm.

Yesu nêb ob lax kisii

²¹ Nang dêc Yesu nêl tii vac vô he ên nêbê, “A ob sea xam di la, di xam obêc myag a, lêc xam obêc wib hixôn nêl nipaên, ên vigwe wê a ob la vac ge xam obêc la vac lêm.” ²² Mêgem he Yuda nêl voma ên nêbê, “Xomxo tige nêl ên nêb il ob la vac vigwe wê ob la dô vac ge lêm. Mêd ici va obêc hi i yib, me?” ²³ Mêd Yesu nêl vô he ên nêbê,

“Xam ge kibun, di a ga kisii ganê. Xam xomxo kibun, di a ga, a o xomxo kibun lêm. ²⁴ Kiyang bêge om a nêl vô xam gwêba ên a nêbê xam obêc wib hixôn nêl nipaên. Ên xam obêc vông i vin bê a Anutu nu lêm ge, od xam obêc wib hixôn nêl nipaên.”

²⁵ Om he kinêg vô Yesu ên nêbê, “Ông letya?” Lêc Yesu nêl vô he ên nêbê, “Bêna lêc a ob nêl kiyang tii vac vac vô xamê? A ga, xomxo ti wê a nêl vô xam ilage. ²⁶ A kiyang wê a ob nêl vô xam di yaxên xam ge tibeac yêp. Lêc xomxo ti wê vông a lam ge, i kiyang nôn om kiyang wê a ngô vô i ge, a nêl kitong vô xomxo kibun ga.”

²⁷ Kiyang wê Yesu nêl vô he ge, he o xovô bê Yesu nêl lec Ma Anutu lêm, ²⁸ om Yesu nêl vô he ên nêbê, “Buc wê xam obêc hi Xomxo Nu lec xax ge od xam obêc xovô bê a Anutu nu mê, di xam obêc xovô bê yuac wê a vông ge a o vông ya xovôên wê aca vông ge lêm. Nge, a nêl kiyang tiyi kiyang wê Mag vông vô a ge. ²⁹ Mag wê vông a lam ge dô hixôn a di o sea a dô tamaên lêm, ên a vông yuac wê Mag ob yê nivihha ge tiyi buc vihhati.” ³⁰ Yesu nêl kiyang tige om xomxo tibeac vông i vin i.

Kiyang nôn obêc piwelac il vêl ên nipaên

³¹ Yesu nêl vô xomxo Yuda wê vông i vin i ge ên nêbê, “Xam obêc hêm a kiyang xôn pilihi mi dô vac ge od xam tu a nuge vông vinên nôn. ³² Xam obêc xovô kiyang nôn, di kiyang nôn obêc piwelac xam vêl di xam dô nimviha.” ³³ Lêc he nêl vô Yesu ên nêbê, “Xe ga Eblaham bue, om xe o la vac xomxo ti kwa ngibi ila mi tu he nue yuac

lêm. Lêc bêna lêc ông nêl ên ông nêbê kiyang tige obêc piwelac xe vêl ên tibii levac wê viac xe ge?”

³⁴ Om Yesu nêl vô he ên nêbê, “A nêl hixôn nô nêl vô xam bê xomxo vihati wê dô vac nipaên ge, he tu nipaên tige nue yuac pyap. ³⁵ Di nue yuac ti o tiyi wê ob dô vac xumac luta ge lêm. Nge, xomxo levac nu vaci wê ob dô vac luta. ³⁶ Om Anutu nu obêc piwelac xam vêl ge, od xam obêc dô nimviha nô nêl di nipaên ti ob pitii lec xam lêm. ³⁷ A xovô ên a nêbê xam ge Eblaham bue, lêcom xam nêb xam ob hi a xib, ên kiyang wê a vông ge o yêp vac xam nilôm lêm. ³⁸ Kiyang wê a nêl ge a nêl i tiyi wê a xê vô Mag ge, di xam ge, xam vông i tiyi wê xam ngô vô mam ge.”

³⁹ Mêd he nêl vô Yesu ên nêbê, “Xe mag Eblaham.” Lêc Yesu nêl vô he ên nêbê, “Xam obêc Eblaham nue nô nêl ge od xam obêc vông môp i tiyi wê Eblaham vông ge. Lêc xam o vông môp tiyi wê Eblaham vông ge lêm. ⁴⁰ A nêl kiyang nô nêl wê a ngô vô Anutu ge vô xam, lêc xam nêb xam ob hi a xib. Môp wê Eblaham vông ge ti o yêp bêge lêm. ⁴¹ Xam vông môp tiyi xochê mam mi vông ge.” Mêd he nêl vô Yesu ên nêbê, “Xe o tiyi xochê nipwo wê ta kô vax di ma ma ge lêm. Xe mag Anutu tibed wê dô ge.” ⁴² Lêc Yesu nêl vô he ên nêbê, “Anutu obêc xam mam vixôhilôg nô nêl ge od xam xêmyaa obêc vin lec a, ên a dô hixôn Anutu lêc lam. Di a o lam i tiyi xovôên wê a vông ge lêm. Nge, Anutu vông a lam. ⁴³ Xam o xovô kiyang wê a nêl ga lêm, kehe bêga nêbê xam nêb xam ob ngô a vyag lêm.

⁴⁴ “Xam mam ge Seten, om kiyang wê yêp vac

mam nilô ge, xam nêb xam ob timu vô mi vông i vô nôn lec. Buc taxlee ilage Seten mi hi xomxo yib di o dô vac kiyang nôn lêm, ên kiyang nôn ti o yêp vac i nilô lêm. Di kiyang wê mi nêl ge, nêl i tiyi kiyang kityooên wê yêp vô i ge, ên i xomxo kityooên wê tu kiyang kityooên kehe. ⁴⁵ Di a ga, a lam nêl kiyang nôn om xam nêb xam ob vông i vin kiyang wê a nêl ge lêm. ⁴⁶ Xam letya tiyi wê xam ob nêl a nêg nipaên seac ge? A nêl kiyang nôn lê, lêc bêna lêc xam o vông i vin a lêmê? ⁴⁷ Anutu nue ob ngô kiyang wê Anutu nêl ge. Lêc xam o Anutu nue lêm, om xam o ngô i vya lêm.”

Yesu luu Eblaham vêl

⁴⁸ He Yuda luu Yesu vya ên nêbê, “Xe nêl vixôhilôg nôn ên xe nêbê ông tibii Samelia wê vimwo nipaên dô vac ông nilôm ge.” ⁴⁹ Lêc Yesu nêl ên nêbê, “Vimwo nipaên ti o dô vac a nilôg lêm. A vông Mag lê vô levac, lêc xam vông a lêg tô sea. ⁵⁰ A o nêb a ob vông a lêg i vô levac lêm, lêc xomxo ti dô wê ob vông a lêg i vô levac, di xomxo tige wê ob yaxên xomxo nêl kiyang. ⁵¹ A nêl hixôn nôn vô xam bê xomxo ti obêc timu vô kiyang wê a vông ge od xomxo tige yibên obêc ma vêl.”

⁵² Mêgem Yuda tigeê nêl vô Yesu ên nêbê, “Om gwêbaga xe xovô ên xe nêbê vimwo nipaên ti dô vac ông nilôm. Ên Eblaham hixôn plopete ilage, he yib mi la vêl, lêc ông nêl ên ông nêbê xomxo ti obêc timu vô kiyang wê ông vông ge od obêc yib gê kibun ga lêm. ⁵³ Mêd ông nginoô il bug Eblaham vêl, me? Ên Eblaham yib di plopete êno yib. Di ông nêb ông ob vông ông tiyi letya?”

⁵⁴ Mêd Yesu nêl vô he ên nêbê, “Aca va obêc pimil a lêg ge od obêc tiyi xocbê kiyang pileva, lêc xomxo ti wê pimil a lêg ge, Mag vaci, wê xam mi nêl ên xam nêbê xam Anutu. ⁵⁵ Lêc xam o xovô i lêm. Dî a ga, a xovô i. A obêc nêl bê a lungên Mag ge od a obêc xomxo kityooên tiyi xocbê xam ge. Lêc a xovô i pyap om a timu vô kiyang vihati wê i vông ge.

⁵⁶ “Ilage bum Eblaham xêyaa vô nivîha ên nêb ob yê buc wê a vông ge, om yê buc tige dî xêyaa vô nivîha.” ⁵⁷ Lêc he Yuda nêl vô Yesu ên nêbê, “Klîsmas wê ông vông ge gên o mîla vô kehe yuu dî vigê yuu (50) lêm, lêc bêna lêc ông nêb ông wê Eblahamê?” ⁵⁸ Mêd Yesu nêl vô he ên nêbê, “A nêl hixôn nôn vô xam bê buc wê Eblaham gên ma ge od a dô tax.” ⁵⁹ He ngô Yesu kiyang tige om he hôm ngîdax ên nêb ob nêx Yesu, lêc Yesu xôpac ên he dî sea Anutu xumac ngîbua dî la vîxun.

9

Yesu vông xomxo ma tocên ti vô nivîha lec

¹ Yesu mîla, lêc yê xomxo ti wê yubac hixôn ma tocên ge. ² Mêd Yesu nue ngîvihi kinêg vô Yesu ên nêbê, “Xolac kehe, letya vông nîpaên lêc xomxo tige yubac hixôn ma tocên? Xomxo tige vaci vông nîpaên, me ta yuu ma?” ³ Lêc Yesu nêl vô he ên nêbê, “Ge o ici va nên nîpaên, me ta yuu ma nên nîpaên wê vông i manôn toc ge lêm. Xomxo tige dô hixôn ma tocên ên Anutu nêb ob hîlung xêkîzêc wê i vông ge i yêp seac lec xomxo tige. ⁴ Xomxo ti wê vông a lam ge, il ob vông yuac wê i vông ge vô vidîiên xêseac, ên

mapitoc obêc val di a xib ge od xomxo ti o tiyi wê ob vông yuac ge lêm. ⁵ Buc wê a dô kibun ga ge, od xêseac wê a vông ge linac vô xomxo gê kibun.”

⁶ Yesu nêl bêge di pisuv myaluc lec kibun di pilepac i vô niluc di lipac vô

xomxo matocên tyo manôn, ⁷ di nêl vô i ên nêbê, “Loc lipac mamnôn vac mia luaên Siloam.” Lê Siloam ge kehe bêga nêbê vông i la. Om xomxo tyo la lipac manôn di manôn seac di i lax mi la ben.

⁸ Mêd xomxo tige lie viyangtôv hixôn xomxo wê yê wê mi kitaa mone vô xomxo ge, he nêl vôma ên nêbê, “Xomxo ti wê mi dô di kitaa mone vô xomxo ge, ge mêd xomxo tyo tige mê, me?”

⁹ Mêd he ya nêl ên nêbê, “Ge xomxo tyo tige mê.” Lêc he ya nêl ên nêbê, “Ge o xomxo tyo lêm. Ge xomxo wê yuu manôn tiyima ge ngwe.” Om xomxo tyo nêl vô he ên nêbê, “A ga mê.” ¹⁰ Om he kinêg vô i ên nêbê, “Vatya vông ông mamnôn vô nivihha lecê?” ¹¹ Mêd xomxo tyo nêl vô he ên nêbê, “Xomxo ti lê nêbê Yesu ge pilepac myaluc hixôn kibun di lipac lec a magnôn di nêl vô a ên nêb a la lipac magnôn vac mia luaên Siloam. Om a la lipac di a magnôn vô nivihha lec di a xê vîgwe.” ¹² Om he kinêg vô i ên nêbê, “Xomxo tyo dô gê na?” Lêc xomxo tyo nêl ên nêbê, “A lungên.”

¹³ Mêgem he kô xomxo ma tocên tyo mi la vô he Palisi. ¹⁴ Buc wê Yesu pilepac kibun vô nubuluc di vông xomxo tyo manôn vô nivihha lec ge, buc sabat, ¹⁵ om he Palisi kinêg vô xomxo tyo tii vac ên nêbê, “Vatya vông ông mamnôn vô

niviha lec?” Om xomxo tyo nêl vô he ên nêbê, “Xomxo tige lipac kibun nubuluc lec a magnôn di a la lipac, lêc a magnôn seac.” ¹⁶ Mêd Palisi ya nêl ên nêbê, “Xomxo tige Anutu o vông i lam lêm, ên o timu vô môp wê sabet ge lêm.” Lêc he ya nêl ên nêbê, “Xomxo tige obêc xomxo nipaên ge od o tiyi wê ob vông do levac tibêge lêm.” Om he hibuma di le kidu yuu.

¹⁷ Mêgem Palisi la kinêg vô xomxo tyo tii vac nang ên nêbê, “Xomxo ti wê vông mamnôn vô niviha lec ge, ông nêbê vatya lec i?” Mêd xomxo tyo nêl ên nêbê, “Ge plopete ti.”

¹⁸ He Yuda o vông i vin bê xomxo tige manôn toc ila lêc vô niviha lec lêm, om he keac xomxo tyo ta yuu ma lam ¹⁹ di kinêg vô yuu ên nêbê, “Muu num tiga wê muu nêb yubac hixôn ma tocên mê? Vatya vông manôn seac mi i yê vigwe?” ²⁰ Om ta yuu ma nêl ên nêbê, “Xii xovô ên xii nêbê ga xii nug wê yubac hixôn ma tocên ge. ²¹ Lêc môp wê manôn seac di i yê vigwe ge, xii lungên, di xii o xovô xomxo ti wê vông i manôn seac ge lêm. Xam loc kinêg vô ici va, ên vô levac pyap tiyi wê ob nêl kiyang kitong vô xam ge.”

²² Ta yuu ma nêl kiyang bêge, ên yuu xona ên he Yuda levac. Ên he Yuda hilu kiyang pyap ên nêbê xomxo ti obêc nêl Yesu kitong bê i Kîlisi ge od he ob tii i vêl ên xumac lilo di i loc dô ninya. ²³ He Yuda nêl bêge om xomxo tige ta yuu ma nêl ên nêbê, “Vô levac pyap om xam kinêg vô ici va.” ²⁴ Om he Palisi keac xomxo ti wê manôn toc ilage lôm tii vac nang di nêl vô i ên nêbê, “Ông pimil

Anutu môci lê. Ên xe xovô ên xe nêbê xomxo tige nipaên.” ²⁵ Lêc xomxo tyo nêl vô he ên nêbê, “A lungên, xomxo tige nivîha me nipaên. Dî a xovô tibed bêga bê ilage a magnôn toc lêc gwêbaga a magnôn seac.”

²⁶ Mêd he kinêg vô i ên nêbê, “Xomxo tige vô va vô ông lêc ông mamnôn seacê?” ²⁷ Lêc xomxo tyo ni nyag vô he om nêl ên nêbê, “A nêl vô xam lê, lêc xam o ngô lêm. Bêna lêc xam nêb a nêl i tii vacê? Mêd xam êno, xam nêb xam ob tu i nue hixônê?” ²⁸ Mêd he nêl kiyang nipaên lec i ên nêbê, “Ông ge, ông tu xomxo tige nu ti, dî xe ga, xe tu Moses nue. ²⁹ Xe xovô ên xe nêbê Anutu nêl kiyang vô Moses, lêc xomxo tige, xe o xovô bê lam gê na?”

³⁰ Mêd xomxo tyo nêl vô he ên nêbê, “Kiyang tige obêc kehe tibêna? Ên xam nêl ên xam nêbê xam o xovô xomxo tige ben kehe lêm, lêc xomxo tige vông a magnôn seac. ³¹ Il xovô ên il nêbê xomxo wê vông môm nipaên ge, Anutu ob ngô he vya lêm. Lêc xomxo ti obêc kitaa vô Anutu dî timu vô kiyang wê i vông ge od Anutu ob ngô i vya. ³² Buc taxlee ilage dî i val tyip lec gwêbaga, il o ngô kiyang lec xomxo ti wê yubac hixôn ma tocên lêc xomxo ngwe vông i manôn seac ge lêm. ³³ Anutu obêc vông xomxo tige lam lêm ge od o tiyi wê ob vông môm tibêge lêm.” ³⁴ Mêd he Palisi nêl vô xomxo tyo ên nêbê, “Tam kô ông hixôn nipaên, lêc ông nêb ông ob nêl kiyang vô xe?” Mêd he tii i la nînya.

He Palisi nilô vô mapitoc

³⁵ Yesu ngô wê he tii xomxo tige la ninya ge om tulec i di kinêg vô i ên nêbê, “Ông vông i vin Xomxo Nu, me?” ³⁶ Lêc xomxo tyo nêl ên nêbê, “Xomxo levac, Xomxo Nu ge letya? Ông nêl kitong vô a ên a vông i vin i.” ³⁷ Om Yesu nêl vô i ên nêbê, “Ông wê i pyap, ên xomxo tyo, a ga wê a keac vô ông mê.” ³⁸ Mêgem xomxo tyo nêl ên nêbê, “Apumtau, a vông i vin.” Mêd yev vixa kitu vô Yesu di pimil i.

³⁹ Mêd Yesu nêl ên nêbê, “A lam kibun ên a nêb a ob yaxên xomxo nilô, ên xomxo wê manôn toc di he lungên a ge he manôn i seac di he wê manôn seac ge he manôn i toc.” ⁴⁰ Palisi ya dô kwabo hixôn Yesu di ngô kiyang wê i nêl ge om nêl vô i ên nêbê, “Ông nêb xe êno mamnôn toc mê?” ⁴¹ Mêd Yesu nêl vô he ên nêbê, “Xam mamnôn obêc toc ge od nipaên ti ob yêp vô xam lêm. Lêc xam nêl ên xam nêbê xam mamnôn seac di xam xovô kiyang vihati, om nipaên levac gên yêp vô xam.”

10

Kiyang pilepacên lec xenac wê bwoc sipsip le vac gê

¹ Yesu nêl ên nêbê, “A nêl hixôn nôn vô xam bê xomxo ti obêc nêb la vac xenac wê bwoc sipsip vông ge nilô, lêc o la bôbac vô vuayen tyo lêm, di lec xenac vac bangwe ge od xomxo tige tiyi xochê xomxo yôdac me tibii vevac. ² Lêc xomxo ti wê obêc la bôbac vac vuayen wê sipsip vông ge, ge xomxo ti wê mi viac sipsip ge, ³ mêgem xomxo ti wê mi viac vuayen ge ob tax vuayen ên

xomxo tige, di sipsip ob ngô xomxo tige vya wê keac mi nêl he toto lê ge om xomxo tyo ob didii he mi la xenac kehe. ⁴ Di bwoc sipsip wê i vông ge ob la xenac kehe pyap ge od xomxo tige ob la mug di sipsip timu vô i vixa mi he la, ên sipsip xovô i vya pyap. ⁵ Di sipsip o tiyi wê ob timu vô xomxo bangwe vixa ge lêm. Nge, ob pec ên i, ên he o xovô i vya lêm.” ⁶ Yesu nêl kiyang pilepacên tige vô he, lêc he o xovô kehe lêm.

Yesu ge wê viac bwoc sipsip nivîha ge

⁷ Mêgem Yesu nêl tii vac vô he ên nêbê, “A nêl hixôn nôn vô xam bêga bê a ga, a tiyi xocbê vuayen wê bwoc sipsip vông ge. ⁸ Xomxo vîhati wê lam tax tax ge he tiyi xocbê xomxo yôdac hixôn tibii vevac, lêc sipsip o ngô he vya lêm. ⁹ A tiyi xocbê vuayen. Xomxo ti obêc lam vô a mi la vac xenac nilô ge od ob la dô nivîha, di obêc lop mi la vixun di lôm la xenac lôma ge od ob tulec yaên. ¹⁰ Tibii yôdac lam ên nêb ob vun bwoc sipsip di hi he yib di vông he vô nipaên. Di a ga, a lam ên a nêb sipsip i dô maviha di kô vizid i luu vêl.

¹¹ “A ga, a xomxo wê a ob viac bwoc sipsip nivîha ge. Xomxo wê viac sipsip nivîha ge ob sea i ninivi di yib ên ngîdu he xôn. ¹² Xomxo ti obêc viac sipsip nêb ob kô mone lec, lêc i o xomxo viacên nôn lêm, di sipsip o tu ixê lêm, om xomxo tige obêc yê wê noo nipaên val ge od obêc sea sipsip dô di pec mi la, di noo nipaên obêc lam nga sipsip di tii he la sea. ¹³ Kehe bêga nêbê xomxo tige viac sipsip ên nêb ob kô mone lec di o xo vigwe pisiv ên sipsip lêm.

14 “A ga, a xomxo wê a ob viac bwoc sipsip niviha ge. A xovô sipsip wê a vông ge di he xovô a, 15 tiyi xochê Mag xovô a di a xovô Mag ge, om a ob xib ên ngidu sipsip xôn. 16 A bwoc sipsip ya dô lê, lêc he gên o lam dô vac xenac tiga lêm. Om a ob la kê he mi lam tung hixôn, di he ob ngô a vyag, mêgem he xôn ob dô kidu tived di xomxo tived ob viac he. 17 Mag xêyaa vin lec a di kehe bêga nêbê a ob vông a diluhu vac yibên, nang dêc a ob kidi lec magviha nang. 18 Xomxo ti o tiyi wê ob hôm a xôn di hi a xib ge lêm. Nge, aca va ob vông a diluhu vac yibên. Aca va xêkizêc tiyi wê a ob vông a la vac yibên ge, nang dêc aca va xêkizêc tiyi wê a ob kidi lec ge. Kiyang tige, Mag nêl vô a ên nêb a vông i vô nôl lec.”

19 He Yuda ngô Yesu kiyang tige om he hibû he mi le kidu yuu, 20 di he tibeac nêl ên nêbê, “Xomxo tige vimwo nipaên dô vac nilô om vông i piyôp juda. Bêna lêcom xam ngô i vya?” 21 Lêc he ya nêl ên nêbê, “Xomxo wê vimwo nipaên dô vac he nilô ge, he ob nêl kiyang tibêge lêm. Vimwo nipaên o tiyi wê ob vông xomxo ma tocên manôn i seac ge lêm.”

He Yuda yê Yesu tiyiên ma

22 Ge buc levac wê Yuda ob xovô buc wê he tax xumac ngibua Jerusalem ge. Buc tige lea yuu ningigooên, 23 mêd Yesu la Anutu xumac ngibua di la vilee lec pêt myahipu ti wê he nêl King Solomon lê lec ge. 24 Mêd Yuda ya la le vivac vô Yesu di nêl vô i ên nêbê, “Ông vông xe nilôm la yuu di obêc miloc vô buc tina? Ông obêc Kîlisi ge od ông nêl ông kitong seac vô xe ên va.”

²⁵ Mêd Yesu nêl vô he ên nêbê, “A nêl vô xam pyap, lêc xam o vông i vin a lêm. Yuac vihati wê a vông lec Mag lê ge, nêl a kitong seac, ²⁶ lêc xam o vông i vin lêm, ên xam o tu bwoc sipsip wê a vông ge lêm. ²⁷ Sipsip wê a vông ge ngô a vyag di a xovô he, di he timu vô a vixag. ²⁸ A obêc vông he dô mavîha luta lêc luta di he ob yib lêm, di xomxo ti ob vô he vêl ên a vigêg lêm. ²⁹ Mag wê vông he vô a ge luu susu vihati vêl om xomxo ti o tiyi wê ob vô he vêl ên Mag vigê ge lêm. ³⁰ Xii xôn Mag, nôn tived.”

³¹ Mêd he Yuda hôm ngidax nêb ob nêx Yesu ya. ³² Lêc Yesu nêl vô he ên nêbê, “A hilung yuac nivîha wê Mag vông ge tibeac vô xam. Om xam wê yuac tina so lêc xam nêb xam ob nêx a ya ngidaxê?” ³³ Lêc he Yuda nêl vô Yesu ên nêbê, “Xe ob nêx ông ya ngidax ên yuac nivîha wê ông vông ge lêm. Nge, xe nêb xe ob nêx ông ên wê ông so vyam vô Anutu ge. Ên ông ge xomxo kibun ga ti, lêc ông nêb ông Anutu.”

³⁴ Mêd Yesu luu he vya bêga ên nêbê, “Kiyang ti yêp vac xolac wê xam vông ge bêga nêbê, ‘A nêl ên a nêb xam ge Anutu.’ ³⁵ Anutu nêl kiyang tige vô xomxo ilage, lêc nêb he Anutu. Di il xovô ên il nêbê xomxo ti o tiyi wê ob kitya Anutu vya vêl ge lêm. ³⁶ Anutu nêb he Anutu, om bêna lêc xam nêl ên xam nêbê a so vyag vô Anutu ên wê a nêl ên a nêbê a Anutu nu ge? Ên a ga, Anutu vînoo a di vông a lam kibun.

³⁷ “A vôngên Anutu yuac obêc ma ge od xam o lêc vông i vin a vyag lêm. ³⁸ Lêc a mi vông yuac wê Mag vông ge, om xam obêc nêb vông i vin a

vyag lêm ge od xam wê yuac wê a mi vông ge di vông i vin. Ên xam obêc vông i vin ge od xam obêc xovô bê Mag dô vac a nilôg di a dô vac Mag nilô.” ³⁹ Mêd xomxo tigeê nêb ob hêm Yesu xôn lê, lêc Yesu vô he vîgê vêl di loc mi la.

⁴⁰ Mêd Yesu lax mi la mia Jodan vilu ganê tii vac nang di la dô vac vîgwe ti wê Jon lipac xomxo vac ilage. ⁴¹ Mêd xomxo tibeac la vô Yesu, di nêl ên nêbê, “Jon o vông do levac ya lêm, lêc kiyang vîhati wê Jon nêl lec xomxo tige, kiyang nôn.” ⁴² Mêgem xomxo tibeac vac vîgwe tige, he vông i vin Yesu.

11

Lasalas yib

¹ Xomxo ti lê nêbê Lasalas vông yidac mi yêp vac ben gê Betani. Betani ge Malia yuu li Mata ben. ² Malia tige wê la too mia nivivea nivîha lec Yesu vîxa di kitya ya nîbavîluhu ge, lêc Malia li vux Lasalas vông yidac. ³ Om li vêx yuu ge vông kiyang la vô Yesu ên nêbê, “Apumtau, xomxo ti wê ông xêmyaa vin lec i ge vông yidac levac di yêp.” ⁴ Yesu ngô kiyang tige di nêl ên nêbê, “Yidac tige ob vông xomxo tige yib lêm. Nge, yidac tige vông, ên nêb ob vông Anutu lê i vô levac di ob vông Anutu nu lê i vô levac êno.”

⁵ Yesu xêyaa vin lec Mata yuu li vêx di Lasalas. ⁶ Yesu ngô wê yidac vông Lasalas ge, lêc dô vîgwe wê dô vac ge tîyi buc yuu hixôn, ⁷ nang dêc nêl vô nue ngîvîhi ên nêbê, “Il ob lax mi la Judia i tii vac nang.” ⁸ Lêc nue ngîvîhi nêl vô i ên nêbê, “Xolac kehe, nyop ge, xomxo Yuda nêb ob nêx ông ya

ngidax, léc ông nêb ông ob lax mi la vigwe tige i tii vac nangê?”

⁹ Mêgem Yesu luu he vya ên nêbê, “Hiyôv manôn vigê yuu di tô mi la yuu yêp vô vidiiên ti. Om xomxo ti obêc vilee vô vidiiên ge od ob mwoc lêm, ên xêseac linac lec kibun. ¹⁰ Léc obêc la vô bucên ge od ob mwoc, ên xêseac o linac vô i lêm.”

¹¹ Yesu nêl pyap, léc nêl vô he nang ên nêbê, “Il lig Lasalas yêp, lêcom a ob la tîpi vô i kidi lec.”

¹² Om Yesu nue ngivihî nêl ên nêbê, “Apumtau, ici va obêc yêp ge od obêc vô nivihî lec nang.”

¹³ Kiyang tige, Yesu nêl lec wê Lasalas yib ge, léc he so ên he nêb mêd Yesu nêl ên nêb Lasalas vaci yêp. ¹⁴ Om Yesu nêl seac vô he ên nêbê, “Lasalas yib, ¹⁵ léc a xêgyaa vô nivihî ên wê a o la dô hixôn i ge lêm, ên a xo xam ên a nêb xam vông i vin a. Om xam lam ên il ob la xê Lasalas.”

¹⁶ Mêd Tomas wê ta kô yuu li ngwe ked ge, nêl vô lie ngivihî ên nêbê, “Xam lam ên il xôn la xib hixôn Yesu.”

Yesu ge kidi lecên yuu mavihî dôên kehe

¹⁷ Mêd Yesu loc mi la ên nêb ob la Betani, léc ngô wê he lii Lasalas vac lôva di buc yuudiyuu la vêl ge. ¹⁸ Betani yêp kwabo vô Jerusalem tîyi xocbê 3 kilomita ge, ¹⁹ om xomxo Yuda tibeac lam yê Mata yuu Malia ên wê li Lasalas yib ge, ên he nêb he ob vông yuu nilô i vô vîyin maên.

²⁰ Mêd Mata ngô wê Yesu val ge om mîla vô i vac môp, di Malia dô vac xumac.

²¹ Mêd Mata nêl vô Yesu ên nêbê, “Apumtau, ông obêc dô ga ge od a lig yibên obêc ma. ²² Léc a xovô ên a nêbê gwêbaga ông obêc kitaa susu

ti vô Anutu ge od Anutu obêc vông i tiiyê wê ông kitaa ge.” ²³ Mêd Yesu nêl vô i ên nêbê, “Lim tuc obêc kidi lec i tii vac nang.” ²⁴ Mêd Mata nêl vô i ên nêbê, “A xovô ên a nêbê obêc buc timuên wê xomxo vîhati obêc kidi lec i tii vac ge od Lasalas ob kidi lec hixôn.” ²⁵ Om Yesu nêl vô i ên nêbê, “Kidi lecên yuu maviha dôn kehe a. Xomxo wê vông i vin a ge he obêc yib lê, lêc obêc kidi lec maviha. ²⁶ Dî xomxo vîhati wê dô maviha dî vông i vin a ge, he yibên obêc ma. Ông vông i vin kiyang tiga, me?”

²⁷ Mêgem Mata nêl vô Yesu ên nêbê, “Apumtau, a vông i vin ên a nêbê ông ge Kilisi. Dî ông Anutu nu, wê Anutu nêb ob vông ông lam kibun ga ge.”

Yesu byag

²⁸ Mata nêl kiyang pyap dî la keac Malia lam dî lum nêl vô i ên nêbê, “Xolac kehe val, lêc nêb ông loc wê i.” ²⁹ Malia ngô kiyang tige mêd kidi lec lutibed dî la vô Yesu. ³⁰ Yesu gên o val vîyangtôv lêm. Nge, gên le vac môt wê Mata mîla vô i ge. ³¹ Mêd he Yuda wê val ên nêb ob vông Malia yuu Mata nilô i vô nivîha ge, he dô vac xumac lôma hixôn Malia dî yê wê Malia kidi lec lutibed dî la ge om he timu vô i vîxa mî la, ên he xo ên he nêb mêd Malia ob la byag lec lôva.

³² Malia mîla vigwe wê Yesu val le ge dî yê Yesu, om mîla kwabo vô i dî yev vîxa kitu vô dî nêl ên nêbê, “Apumtau, ông obêc dô ga ge od a lig yibên obêc ma.” ³³ Yesu yê wê Malia he Yuda wê lam hixôn i ge byag ge, om Yesu yetac dî nilô vô vîyin mabu. ³⁴ Mêd kinêg vô he ên nêbê, “Xam

lii Lasalas loc yêp tina?” Mêd he nêl ên nêbê, “Apumtau, lam wê.”

³⁵ Mêgem Yesu byag, ³⁶ om Yuda tige nêl ên nêbê, “Wê, xomxo tige xêyaa vin lec Lasalas luu vêl.” ³⁷ Lêc he ya nêl ên nêbê, “Xomxo tige vông xomxo ma tocên manôn seac, lêc mêd o tiyi wê ob ngïdu Lasalas xôn ên yibên i ma ge lêmê?”

Yesu tîpi vô Lasalas kidi lec maviha vac yibên

³⁸ Yesu nilô vô viyin levac di i mila vô lôva wê he lii Lasalas yêp vac ge. Lôva tige le vac ngïdax di he lax ngïdax ti le vac lôva mya xôn. ³⁹ Mêd Yesu nêl ên nêbê, “Hôm ngïdax tige vêl.” Lêc yibên tyo li vêx Mata nêl ên nêbê, “Apumtau, Lasalas yib mi xe yev, di buc yuudiyuu lam la vêl, om nuhu tyip.” ⁴⁰ Lêc Yesu nêl vô i ên nêbê, “A nêl gwêba vô ông ên a nêbê ông obêc vông i vin ge od ông ob wê xêseac wê Anutu vông ge.” ⁴¹ Mêgem he hôm ngïdax tige vêl di Yesu lax ma la kisii di nêl ên nêbê, “Mag, a hi vixag pec ên wê ông ngô kitaaên wê a vông ge. ⁴² Di a xovô ên a nêbê tiyi buc vihati ông vô ninyam vô a vyag, lêc a nêl kiyang tiga ên a nêb xomxo wê val le gae, he i ngô di vông i vin bê ông vông a lam.”

⁴³ Yesu nêl bêge mêd tyuc vya levac ên nêbê, “Lasalas, kidi lec mi lam.” ⁴⁴ Mêgem Lasalas kidi lec di lam vixun lêc lam hixôn nivimihi wê he viyum vigê yuu vixa vac ge di nivimihi nipwo ti wê he viyum manôn vac ge hixôn, om Yesu nêl vô he ên nêbê, “Xam piwelac nivimihi vêl di vông i loc.”

Yuda levac hilu kiyang pyap ên nêb ob hi Yesu i yib

(Matyu 26:1-5; Mak 14:1-2; Luk 22:1-2)

⁴⁵ Yuda wê la vô Malia ge, he yê wê Yesu tipi vô Lasalas ge, om he tibeac vông i vin Yesu. ⁴⁶ Lêc he ya la vô Palisi di la nêl môm wê Yesu vông ge kitong vô he. ⁴⁷ Mêgem Palisi hixôn xomxo levac wê mi si daa gee, he kitucma hixôn kaunsil vihati di nêl voma ên nêbê, “Il ob vông bêna? Ên xomxo tyo vông do levac tibeac, ⁴⁸ om il obêc dixê ya madnôn di i dô ge od obêc vông do levac ya hixôn di xomxo vihati obêc vông i vin i, di tibii Lom wê viac il ge obêc val kipê xumac ngibua wê il vông ge sea di vông il vô nipaên hixôn.”

⁴⁹ Lêc he ti lê nêbê Kaiapas wê tu xomxo daa siên nêl levac lec klismas tige nêl vô he ên nêbê, “Xam o xovô kiyang ti lêm, ⁵⁰ di xam o xovô môm wê ob vô nivaha vô xam ge lêm. Xam ngô lê. Xomxo tibeac obêc yib ên xomxo vihati ge od obêc vô nivaha vô il di tibii Lom ob lam kitya il vêl lêm.” ⁵¹ Kaiapas o nêl kiyang tige ya xovôên wê ici va vông ge lêm. Nge, tu xomxo wê mi si daa gee nêl xomxo levac lec klismas tige om nêl kiyang bo tige seac lec Yesu wê ob yib ên he Yuda ge. ⁵² Lêc ob yib ên Yuda vaci lêm. Nge, ob yib ên kituc Anutu nue vihati wê dô vac vigwe vihati ge he lam dô kidu tibeac.

⁵³ Vô buc tige Yuda hilu kiyang pyap nêb ob hi Yesu i yib. ⁵⁴ Om Yesu o la vîlee vac Yuda mahigun ti tii vac lêm. Nge, sea vigwe tige mi la vigwe ti lê nêbê Iplem wê yêp kwabo vô vigwe

mahigun pileva ge, mêd Yesu he nue ngivihi la dô vac vigwe tige.

⁵⁵ Buc levac wê Yuda ob xovô buc Pasova Isip ilage vô kwabo lec, om xomxo tibeac vac vigwe toto ge kituc la Jelusalem tax, ên nêb ob la viac he ên buc tige. ⁵⁶ Om he myag Yesu vac Anutu xumac ngibua di nêl voma ên nêbê, “Xam xo bêna? Xam nêb Yesu ob yê buc tiga hixôn, me?” ⁵⁷ Xomxo levac wê mi si daa gee hixôn Palisi nêl kiyang pyap ên nêbê xomxo ti obêc xovô vigwe ti wê Yesu la dô vac ge od i lam nêl kitong vô he ên he ob la hôm Yesu xôn.

12

*Malia too mia nivivea nivaha lec Yesu vixa
(Matyu 26:6-13; Mak 14:3-9)*

¹ Buc vigê vilu di sec ti gên yêp di obêc buc Pasova, di Yesu lax mi la Betani wê tipî vô Lasalas kidi lec maviha vac yibên ge. ² Mêd he myêl yaên vô Yesu, di Mata duu yaên di Lasalas dô hixôn he wê ob ya yaên hixôn Yesu ge. ³ Mêd Malia kô mia nivivea nivaha vac butol ti. Mia tige he kisuu lec mone levac mabu. Mêd Malia kô mi la too lec Yesu vixa di kitya ya nibaviluhu. Om mia nivivea tige la pup vac xumac nilô.

⁴ Lêc Yesu nue ngivihi ti lê nêbê Judas Iskaliot wê ob vông Yesu vac tibii vevac vigê ge nêl ên nêbê, ⁵ “Bêna lêc il o vông mia tige mi tibii kisuu ya mone yul yon (K300) ên il vông vô tibii wê nêl susu maên geê?” ⁶ Judas nêl bêge lêc o xo tibii wê nêl susu maên ge lêc nêl kiyang tige lêm. Ên Judas ge tibii yôdac ti lê, lêc mi viac Yesu he nue

ngivihî tin wê mone mi dô vac ge om mone wê he mi tung la vac tin ge Judas mi kô ya yôdac. ⁷ Lêc Yesu nêl vô i ên nêbê, “Vông vêx tige i dô, ên vông tixuuên lec buc wê he ob lipac mia nivivea lec a nignivi di yev a ge. ⁸ Xomxo wê nêl susu maên ge ob dô hixôn xam buc dia, di a ga, a ob dô hixôn xam buc dia lêm.”

Yuda levac hilu kiyang pyap nêb ob hi Lasalas i yib

⁹ Yuda tibeac ngô wê Yesu la dô Betani ge om he lam vô i, lêc he o lam nêb he ob yê Yesu vaci lêm. Nge, he nêb ob yê Lasalas wê Yesu tipi vô i kidi lec vac yibên ge hixôn. ¹⁰ Mêgem xomxo levac wê mi si daa gee hilu kiyang pyap ên nêb ob hi Lasalas i yib hixôn, ¹¹ ên Yuda tibeac xovô wê Lasalas kidi lec vac yibên ge om sea Yuda levac di vông i vin Yesu.

*Yesu la Jelusalem tiyi xocbê xomxo levac ti
(Matyu 21:1-11; Mak 11:1-11; Luk 19:28-40)*

¹² Mêd vigwe vidiiên titige xomxo tibeac wê lam dô ên nêb ob yê buc levac ge, he ngô wê Yesu ob mila Jelusalem ge, ¹³ om he la kô xax lihi di mila vô Yesu vac môp di tyuc hixôn nêbê, “Il ob pimil Anutu di hi vixad i pec ên xomxo ti wê tu Apumtau manôn di lam ge, ên i ge tu xomxo levac wê ob viac il Islel.”

¹⁴ Mêd Yesu la kô bwoc donki nu ti mi dô lec, tiyi xocbê kiyang wê yêp vac xolac bêga nêbê,

¹⁵ “Xam xomxo Saion, xam xona ên i ma. Xam wê lê. Xam xomxo levac wê ob viac xam ge dô lec bwoc donki nu ti mi val.”

¹⁶ Vô buc tige Yesu nue ngivihî gêl lungên kiyang tige kehe, lêc buc wê Yesu lax dô vac xêseac ge od he xo i lax lec kiyang tige wê yêp vac xolac ge di xovô nêbê kiyang tige vô nôn lec vô Yesu.

¹⁷ Xomxo wê dô hixôn Yesu di yê wê Yesu tîpi vô Lasalas kidi vac lôva mî lam ge la nêl kiyang tige kitong vô xomxo tîbeac. ¹⁸ Om xomxo tîbeac ngô wê Yesu vông do levac tige om he mîla vô Yesu vac môp. ¹⁹ Mêd Palisi nêl vông ên nêbê, “Xam wê lê. Il nêd kiyang nôn ma, ên xomxo vîhati la tîmu vô Yesu.”

Glik ya nêb ob yê Yesu

²⁰ Xomxo tîbeac la Jelusalem ên nêb ob la kitaa vô Anutu lec buc ngibua tige lêc Glik ya la hixôn. ²¹ Om Glik tige la vô Pilip wê ben Betsaida vac vîgwe levac Galili ge, di la nêl vô i ên nêbê, “Xomxo levac, xe ob xê Yesu.” ²² Om Pilip la nêl vô Andlu, di yuu la nêl vô Yesu. ²³ Lêc Yesu nêl vô yuu ên nêbê, “Buc wê Xomxo Nu ob kô lê levac ge vô kwabo lec pyap. ²⁴ A nêl hixôn nôn vô xam bê skom nôn ti obêc la vac kibun lêm ge od ob dô ya nôn tîbed. Lêc obêc la dô vac kibun nîlô ge od ob tîyp mî vô nôn tîbeac. ²⁵ Xomxo ti xêyaa obêc vin lec ici va nîvî ge od nîvî wê i vông ge obêc yib. Lêc xomxo ti obêc vông i vin Anutu di yê ici va nîvî tîyi xochê susu pîleva gê kibun ga ge od obêc la dô mavîha luta lêc luta. ²⁶ Xomxo ti obêc nêb vông yuac wê a vông ge od i lam tîmu vô a, ên vîgwe wê a ob dô vac ge, a nuge yuac obêc dô hixôn a. Di xomxo ti obêc vông yuac wê a vông ge od Mag obêc vông lê levac vô i.

Yesu nêl lec wê ob yux lec xax ge

²⁷ “Gwêbaga a nilôg vô viyin levac om a ob nêl bêna? A ob nêl bê ‘Mag, ông vô viyin tiga vêl ên a’? Ma vêl, a ob nêl bêge lêm. Ên a lam ên a nêb a ob kô viyin tige. ²⁸ Mag, ông vông ông lêm i vô levac.” Yesu nêl bêge mêd vya ti lam gê lag puunê ên nêbê, “A vông a lêg vô levac pyap di a ob vông i vô levac tii vac nang.” ²⁹ Lêc xomxo wê le kwabo gee ngô vya tige om he ya nêl ên nêbê, “Deac tug,” di he ya nêl ên nêbê, “Angela ti keac vô i.”

³⁰ Lêc Yesu luu he vya ên nêbê, “Vya tige o lam vô a ên nêb a ngô lêm. Nge, lam ên nêb xam ngô. ³¹ Gwêbaga Anutu ob yaxên xomxo kibun ga nêb kiyang di ob tii Seten wê tu xomxo kibun ga nêb levac ge i la vêl. ³² Gwêbaga a gên dô kibun, lêc buc wê a obêc yux lec xax ge od a ob didii xomxo vihati lam vô a.” ³³ Yesu nêl kiyang tige ên nêb ob nêl môp wê ob yib ge kehe kitong vô he.

³⁴ Mêd xomxo tige luu i vya ên nêbê, “Xe ngô kiyang wê yêp vac xolac bêga nêbê Kilisi ob dô maviha luta lêc luta. Bêna lêc ông nêb Xomxo Nu ob yux lec xaxê? Xomxo Nu ge letya?” ³⁵ Mêd Yesu nêl vô he ên nêbê, “Xêseac ob dô hixôn xam myabo tya. Om buc wê xêseac dô hixôn xam ge od xam loc vac xêseac, ên mapitoc i o lêc hivun xam xôn lêm. Ên xomxo ti obêc la vac mapitoc ge od ob lungên môp wê ob la vô ge. ³⁶ Om xam vông i vin xêseac wê dô hixôn xam ge, êdêc tu xêseac nue.” Yesu nêl kiyang tige pyap mêd sea he di la xôpac ên he.

Yuda tibeac o vông i vin Yesu lêm

³⁷ Yesu vông do levac tibeac vô xomxo manôn mi he yê, léc he o vông i vin i lêm. ³⁸ Om kiyang wê plopét Aisaia nêl ilage vô nôn lec. Kiyang tige yêp bêga nêbê,

“Apumtau, letya vông i vin kiyang wê xe nêl ge? Apumtau hilung xêkizêc wê i vông ge lê, léc letya vông i vin? Xomxo ti o vông i vin lêm.”

³⁹ Xomxo tige tîyîên ma wê ob vông i vin Yesu ge di kehe yêp vac kiyang ngwe wê Aisaia kivuu bêga nêbê,

⁴⁰ “Anutu vông he manôn toc di vông he piyôp vô xêkizêc, om he manôn yêên ma di he piyôp xovôên kiyang ti ma, di he o pilepac he bê Anutu ob vông he dô nivîha lêm.”

⁴¹ Aisaia yê xêseac wê Kîlisi vông ge om nêl kiyang tige lec Kîlisi vaci.

⁴² Mêgem Yuda levac, he tibeac vông i vin Yesu, léc he xona ên Palisi om he o nêl vông vinên wê he vông ge kitong seac lêm, ên he xona ên wê Palisi obêc tîi he vêl ên xumac lilo di vông he la dô nînya ge. ⁴³ Ên Yuda tige xêyaa vin lec nêb xomxo i yê he nivîha, di he o xovô nêbê Anutu i yê he nivîha lêm.

Yesu kiyang wê ob yaxên xomxo ge

⁴⁴ Yesu keac vya levac yêp seac ên nêbê, “Xomxo ti obêc vông i vin a ge od o vông i vin aca va tîbed lêm. Nge, vông i vin xomxo ti wê vông a lam ge hixôn. ⁴⁵ Di xomxo wê yê a ge od yê xomxo ngwe wê vông a lam ge hixôn. ⁴⁶ A lam dô kibun ga hixôn xêseac, ên a nêb xomxo wê vông i vin a ge, he i o léc dô vac mapitoc nang

lêm. ⁴⁷ Xomxo ti obêc ngô a kiyang lêc timu vôn obêc ma ge od a ob titô i lêm. Ên a o lam ên a nêb a ob yaxên xomxo nêb kiyang lêm. Nge, a lam ên a nêb a ob hêm he lec. ⁴⁸ Xomxo ti obêc vô nîmi vô a dî ngôên a kiyang obêc ma ge od i nêb wê ob yaxên i ge yêp, ên kiyang wê a nêl ge obêc yaxên i vô buc timuên. ⁴⁹ Ên kiyang wê a nêl ge a o nêl ya xovôên wê a vông ge lêm. Nge, Mag wê vông a lam ge, ici va nêl kiyang vô a ên nêb a lam nêl seac. ⁵⁰ Dî a xovô ên a nêbê kiyang wê Mag nêl ge ob vông xomxo dô maviha luta lêc luta, om kiyang wê a nêl ge a nêl vihati tiyi xocbê Mag nêl vô a ge.”

13

Yesu lipac nue ngivîhi vîxa

¹ Buc Pasova vô kwabo lec, om Yesu xovô nêbê buc wê ob sea kibun dî lax mî la vô Ma ge val vô kwabo lec pyap. Yesu xêyaa vin lec nue wê dô kibun ga tiyi buc vihati dî i la tyip lec buc wê ob yib lec ge.

² Vigwe huc mêd Yesu he nue ngivîhi ya yaên mî dô. Lêc Seten vông xovôên vô Judas Iskaliot wê Saimon nu ge ên nêb i nêl Yesu kitong vô tibii vevac. ³ Yesu xovô nêbê Ma vông xêkizêc vô i pyap, dî xovô nêbê i lam vô Anutu dî obêc lax mî la vô Anutu i tii vac nang. ⁴ He gên diya, lêc Yesu kidi lec dî kwax nivîmihi vêl dî hêm taul dî vêx lec, ⁵ mêd too mîa vac pile levac ti dî la vô nue ngivîhi toto dî la lipac he vîxa dî kitya ya taul ti wê vêx lec i ge. ⁶ Mêd mîla vô Saimon Pita lêc Pita kinêg vô i ên nêbê, “Apumtau, ông ob lipac a

vixag?” ⁷ Mêd Yesu luu i vya ên nêbê, “Gwêbaga ông lungên môp wê a vông ga, lêc timuên ge ông obêc xovô.” ⁸ Lêc Pita nêl vô i ên nêbê, “Tiyiên ma vêl wê ông ob lipac a vixag ge.” Mêd Yesu luu i vya ên nêbê, “A lipacên ông obêc ma ge od o tiyi wê ông ob dô hixôn a ge lêm.” ⁹ Om Pita nêl vô i ên nêbê, “Apumtau, obêc bêge ge od ông ob lipac a vixag pileva lêm. Nge, ông lipac a vigêg yuu bagzub hixôn.” ¹⁰ Lêc Yesu nêl vô i ên nêbê, “Xomxo wê lipac mia pyap ge ob

lipac ninivi vihati tii vac lêm. Nge, ob lipac vixa pileva, ên ninivi vihati vô paha lec. Di xam ge, xam vô paha lec pyap, lêcom o xam vihati lêm.” ¹¹ Yesu xovô xomxo ti wê ob vông i la vac tibii vevac vigê ge om nêl ên nêbê, “Xam vô paha lec pyap, lêcom o xam vihati lêm.”

¹² Yesu lipac he vixa pyap mêd vinyum nivimihi lec nang di lax dô di kinêg vô he ên nêbê, “Môp wê a vông vô xam gwêbaga, xam xovô kehe, me? ¹³ Xam mi nêl a ên xam nêb a xolac kehe di a Apumtau, om xam nêl i la tiyi, ên a bêge mêge. ¹⁴ A ga Apumtau di a xolac kehe, lêc a lipac xam vixam, om xam êno, xam lipac lime vixa. ¹⁵ Gwêbaga a hilung môp vô xam ên a nêb xam vông i tiyi xocbê a vông vô xam ge. ¹⁶ A nêl hixôn nôn vô xam bêga bê xomxo yuac ti ob luu i xomxo levac vêl lêm, di xomxo ti wê la nêl xomxo ngwe kiyang ge ob luu xomxo ti wê vông i la ge vêl lêm. ¹⁷ Xam obêc xovô kiyang tiga mi vông i tiyi ge od xam xêmyaa obêc vô nivîha.

¹⁸ “Lêc a o nêl kiyang tiga lec xam vihati lêm. Xam wê a vinoo xam mi xam tu axe ge, a xovô

xam pyap. Lêc kiyang wê yêp vac xolac ge ob vô nôn lec, kiyang wê nêl bêga nêbê,
 ‘Xomxo ti wê ya yaên hixôn a ge kô vixa lec kisii,
 nêb ob kê a.’

¹⁹ Kiyang tige gên o vô nôn lec lêm, lêc a nêb a ob nêl kitong vô xam tax, ên obêc vô nôn lec timuên ge od xam xovô bê a xomxo tyo. ²⁰ A nêl hixôn nôn vô xam bê xomxo ti obêc hôm xomxo wê a vông he la ge lec nivîha ge, od tîyi xocbê hôm a lec nivîha hixôn, di xomxo ti obêc hôm a lec nivîha ge od tîyi xocbê hôm xomxo ti wê vông a lam ge lec nivîha hixôn.”

Yesu nêl xomxo ti wê ob vông i vac tibii vevac vigê ge kitong

(Matyu 26:20-25; Mak 14:17-21; Luk 22:21-23)

²¹ Yesu nêl kiyang tige pyap mêd nilô vô viyin mabu di i nêl kiyang seac vô he ên nêbê, “A nêl vixôhilôg nôn vô xam bêga bê xacxam ti obêc vông a vac tibii vevac vigê.” ²² Lêc Yesu nue ngivîhi lungên kiyang tige kehe om yêma manôn, ên nêb mêd nêl kiyang tige lec letya? ²³ A, Jon wê Yesu xêyaa vin lec a luu vêl ge, a dô kwabo vô Yesu, ²⁴ om Saimon Pita nêx kwa vô a ên nêb a kinêg vô Yesu bê Yesu nêl kiyang tige lec letya? ²⁵ Om a du mi la kwabo vô Yesu di kinêg vô i ên nêbê, “Apumtau, ông nêl kiyang tige lec letya?” ²⁶ Mêd Yesu nêl vô a ên nêbê, “Xomxo ti wê a ob tinyum blet vac mia mi vông vô ge, tyo tige mê.” Mêgem Yesu hôm blet ti di tinyum vac mia di vông vô Judas wê Saimon Iskaliot nu ge.

²⁷ Judas hôm blet tige mi ya di lutibed Seten la vac i nilô, mêd Yesu nêl vô Judas ên nêbê, “Môp wê ông nêb ông ob vông ge, ông vông lutibed.”

²⁸ He wê dô lec tevol ge, ti o xovô kiyang wê Yesu nêl vô Judas ge kehe lêm. ²⁹ He xovô ên he nêbê Judas mi viac tin wê he mone mi dô vac ge om he ya xo ên he nêb Yesu mêd nêl vô Judas nêb i loc kisuu yaên wê he ob ya lec buc levac ge, me nêb i loc vông mone vô tibii wê nêb mone maên ge. ³⁰ Judas hôm blet tige mi ya vêl di lop mi la vixun lutibed di vigwe buc.

Yesu nêl xolac paha ti vô he

³¹ Judas la pyap mêd Yesu nêl ên nêbê, “Gwêbaga xêseac wê Xomxo Nu vông ge val le seac, di Xomxo Nu vông xêseac wê Anutu vông ge val le seac hixôn. ³² Di Xomxo Nu obêc hilung xêseac wê Anutu vông ge od Anutu vaci ob hilung xêseac wê Xomxo Nu vông ge lutibed. ³³ Xam nuge, a ob dô hixôn xam myabo tya, di xam obêc myag a, lêc kiyang wê a nêl vô he Yuda ge, a ob nêl vô xam hixôn bêga bê vigwe wê a ob la dô vac ge, xam ti o tiyi wê xam ob la vac ge lêm. ³⁴ A ob nêl xolac paha ti vô xam bêga bê xam xêmyaa i vin lecma. A xêgyaa vin lec xam om xam xêmyaa i vin lecma i tiyi xochê a xêgyaa vin lec xam ge. ³⁵ Ên xam xêmyaa obêc vin lecma ge od xomxo vihati obêc xovô bê xam tu a nuge.”

Yesu nêl nêb Pita obêc yax i vun

(Matyu 26:31-35; Mak 14:27-31; Luk 22:31-34)

³⁶ Mêd Saimon Pita kinêg vô Yesu ên nêbê, “Apumtau, ông ob la na?” Mêd Yesu luu i vya ên nêbê, “Vigwe wê a ob la vac ge, gwêbaga o tiyi wê ông ob timu vô a vixag ge lêm. Lêc timuên

ge ông obêc timu vô a vixag.” ³⁷ Om Pita nêl vô i ên nêbê, “Apumtau, bêna lêc a o tiyi wê a ob timu vô ông gwêbaga lêmê? A tiyi wê a ob xib ên ngidu ông xôn.” ³⁸ Lêc Yesu nêl vô i ên nêbê, “Ông nêb ông ob wib ên ngidu a xônê? A nêl hixôn nôn vô ông bê kokilêx obêc gên vô vya lêm di ông ob yax a vun lu yon.”

14

Yesu ge môp wê ob la vô Anutu ge

¹ Yesu nêl vô he ên nêbê, “Xam nilôm i o lêc vô viyin lêm. Xam vông i vin Anutu, om xam vông i vin a hixôn. ² Xumac wê Mag vông ge, nilô tibeac yêp. Obêc ma ge od a obêc nêl kitong vô xam ilage lê. Lêc yêp vixôhilôg, om a ob lax ên lax viac xam bom wê xam obêc mîla dô vac ge. ³ Di a obêc viac pyap ge, od a ob lôm kô xam, ên xam loc dô hixôn a vac vîgwe wê a ob dô vac ge. ⁴ Di vîgwe wê a ob la vac ge, xam xovô môp pyap.”

⁵ Lêc Tomas nêl vô Yesu ên nêbê, “Apumtau, vîgwe wê ông ob la vac ge, ge xe lungên, om xe ob xovô môp tige bêna?”

⁶ Om Yesu nêl vô i ên nêbê, “A ga môp, di a kiyang nôn kehe, di a maviha dôên kehe. Om xomxo ti obêc la vô Mag vô môp bangwe lêm, ên môp wê ob la vô Mag ge a tîbed. ⁷ Xam obêc xovô a ge od xam obêc xovô Mag hixôn, di gwêba lêc xam xovô i, ên xam wê i pyap.” ⁸ Mêd Pilip nêl vô i ên nêbê, “Apumtau, ông hilung mam vô xe di obêc pyap.”

⁹ Lêc Yesu nêl vô i ên nêbê, “Pilip, a dô hixôn xam buc xuhu dia, lêc xam gên lungên a? Xomxo wê yê a ge yê Mag. Bêna lêc ông nêb a hîlung Mag vô xamê? ¹⁰ Mêd ông gên o vông i vin bê a dô vac Mag nîlô đi Mag dô vac a nîlôg lêm, me? Kiyang wê a nêl vô xam ge, a o nêl ya xovôên wê a vông ge lêm. Nge, Mag wê dô vac a nîlôg ge, a vông yuac wê i vông ge. ¹¹ Xam vông i vin bêga bê a dô vac Mag nîlô đi Mag dô vac a nîlôg. Lêc xam obêc vông i vin kiyang tige lêm ge od xam wê yuac wê a vông ge đi vông i vin.

¹² “A nêl vixôhîlôg nôn vô xam bê xomxo wê vông i vin a ge ob vông do tiyi xochê a mi vông ge, đi obêc vông do levac luu wê a vông ge vêl, kehe bêga nêbê a ob lax vô Mag. ¹³ Đi susu vihati wê xam ob kitaa lec a lêg ge a obêc vông i vô nôn lec, ên a ob vông xêseac wê Mag vông ge i yêp seac. ¹⁴ Om xam obêc kitaa susu ti lec a lêg ge od a obêc vông i vô nôn lec.

Yesu nêl nêb ob vông Myakilôhô Ngibua i lam

¹⁵ “Xam xêmyaa obêc vin lec a ge od xam obêc timu vô xolac wê a nêl ge. ¹⁶ Đi a obêc kitaa vô Mag đi Mag obêc vông xomxo ngwe i lam vô xam. Xomxo tige wê ob ngîdu xam xôn đi dô hixôn xam luta. ¹⁷ Ge Myakilôhô Ngibua wê ob nêl kiyang nôn, lêc xomxo kibun ga o tiyi wê ob kô i lec nivîha ge lêm, ên he o xovô i lêm. Lêc xam xovô i pyap, ên mi dô hixôn xam đi obêc dô vac xam nîlôm.

¹⁸ “A obêc sea xam dô tamaên xochê xomxo pîbua ge lêm. Nge, a obêc lôm vô xam i tii vac.

¹⁹ Buc myabo tya đi xomxo kibun ga ob yê a

tii vac lêm, lêc xam ge, xam obêc wê a. A dô magviha om xam êno obêc dô mamviha. ²⁰ Obêc buc tige od xam obêc xovô bê a dô vac Mag nilô di xam dô vac a nilôg, di a dô vac xam nilôm. ²¹ Xomxo ti obêc ngô a kiyang di viac nivîha ge od xomxo tige xêyaa vin lec a, di xomxo ti xêyaa obêc vin lec a ge od Mag xêyaa ob vin lec i di a xêgyaa ob vin lec xomxo tige di a obêc hilung a vô i.”

²² Yesu nêl bêge mêd Judas ngwe wê o Judas Iskaliot lêm ge nêl vô Yesu ên nêbê, “Apumtau, bêna lêc ông ob hilung ông vô xe di ông ob hilung ông vô xomxo kibun ga vihati lêmê? Ge kehe bêna?” ²³ Om Yesu luu i vya ên nêbê, “Xomxo ti xêyaa obêc vin lec a ge od obêc viac kiyang wê a nêl ge nivîha, di Mag xêyaa obêc vin lec xomxo tige di xii Mag ob la dô hixôn i. ²⁴ Lêc xomxo wê xêyaa o vin lec a lêm ge ob viac a kiyang nivîha lêm. Di kiyang wê xam ngô ge, o a kiyang lêm. Nge, Mag wê vông a lam ge, i kiyang.

²⁵ “A gên dô hixôn xam om a nêl kiyang tiga vô xam. ²⁶ Lêc xomxo ti dô wê ob ngidu xam xôn, ge Myakilôhô Ngibua wê Mag ob vông i lam lec a lêg om obêc lam tixuu xam ya kiyang vihati, di obêc vông xam piyôp yêp seac di xam xovô kiyang vihati wê a nêl vô xam ge.

²⁷ “A ob sea kiyang malehe i yêp vô xam, di kiyang malehe wê a vông ge, a ob vông vô xam. Kiyang malehe wê a vông ge o tiyi xocbê kiyang malehe wê xomxo kibun ga vông ge lêm. Om xam nîbum i o lêc tipi di xam xona lêm. ²⁸ Xam ngô wê a nêl vô xam ên a nêbê, ‘A ob sea xam di

la, dêc a obêc vena vô xam i tii vac.' Xam xêmyaa obêc vin lec a ge od xam xêmyaa obêc vô nivihha ên wê a ob la vô Mag ge, ên Mag ge xomxo levac luu a vêl. ²⁹ Kiyang ge gên o vô nôn lec lêm, léc a nêl kitong vô xam tax, êdêc vô nôn lec timuên ge od xam vông i vin.

³⁰ "A ob nêl kiyang tibeac ti vô xam lêm, ên Seten wê tu xomxo kibun ga nêl levac ge ob val, léc o tiyi wê ob pwoo a pec ge lêm. ³¹ A nêb xomxo kibun ga vîhati he i xovô bê a xêgyaa vin lec Mag, om a ob vông yuac vîhati i tiyi wê Mag nêl vô a ge. Om xam kidi lec ên il ob la.

15

Yesu ge tu xax wain nôn

¹ "A xax wain wê nôn ge, di Mag ge wê tu yuac kehe. ² Om ngen wê a vông ge wê o vuac nôn lêm ge, Mag ob xoo vêl, di ngen wê vuac ge, Mag ob yal mavigen vêl di pityep ên i vuac nôn tibeac. ³ Kiyang wê a nêl vô xam ge vông xam vô paha lec pyap. ⁴ Xam dô vac a nilôg di a ob dô vac xam nilôm. Ên xam obêc dô vac a nilôg lêm ge od xam ob vô nôn ti lêm, tiyi xocbê xax ngen obêc kitiv lec xax yatôv lêm ge od ob vuac nôn ti lêm.

⁵ "A ga xax wain, di xam ge ngen. Om xomxo ti obêc dô vac a nilôg di a ob dô vac i nilô ge od ob vuac nôn tibeac, léc xam obêc sea a ge od xam o tiyi wê xam ob vông yuac nivihha ti ge lêm. ⁶ Xomxo ti obêc dô vac a nilôg lêm ge od obêc tiyi xocbê xax ngen wê he hup vêl di byêx i la di i la

mupac di he nêx i la vac ngwax di ngwax ya vêl ge.

⁷ “Xam obêc dô vac a nilôg di a kiyang obêc yêp vac xam nilôm ge od susu wê xam xêmyaa vin lec mi xam kitaa ge od ob vô nôn lec vô xam.

⁸ Xam obêc vô nôn tibeac ge od ob vông Mag lê vô levac di xam tu a nuge. ⁹ A xêgyaa vin lec xam tiyi xocbê Mag xêyaa vin lec a ge, om xam dô vac xêyaa vin lecên wê a vông ge nilô i tiyi buc vihati. ¹⁰ Xam obêc timu vô kiyang wê a nêl ge od xam ob dô vac xêyaa vin lecên wê a vông ge nilô, tiyi xocbê a timu vô kiyang wê Mag vông ge om a dô vac xêyaa vin lecên wê i vông ge nilô.

¹¹ A nêl kiyang tige vô xam ên a nêb xêyaa nivaha wê a vông ge i loc vô xam di i pup vac xam nilôm.

¹² “Xolac wê a ob nêl vô xam ge bêga bê xam xêmyaa i vin lecma i tiyi xocbê a xêgyaa vin lec xam ge. ¹³ Xomxo ti obêc yib ên ngidu lie xôn ge od xêyaa vin lecên wê i vông ge levac luu vêl.

¹⁴ Di xam obêc timu vô kiyang wê a nêl vô xam ge od xam tu a lige nôn. ¹⁵ Ilage a nêb xam tu a nuge yuac, lêc gwêbaga a ob nêl bê xam tu a lige.

Ên nue yuac o xovô môp wê he nêb xomxo levac nêb ob vông ge lêm, lêcom xam xovô a kiyang vihati pyap, ên kiyang wê a ngô vô Mag ge, a nêl vihati vô xam mi xam xovô pyap.

¹⁶ “Xam o vînoo a lêm. Nge, a vînoo xam di vông yuac vô xam ên a nêb xam loc vô nôn tibeac di nôn wê xam vông ge i yêp luta. Di xam obêc kitaa susu ti vô Mag lec a lêg ge od Mag obêc vông vô xam. ¹⁷ Om xolac wê a ob nêl vô xam ge bêga bê xam xêmyaa i vin lecma.

Xomxo kibun ga ob yê Yesu nue tiyiên ma

¹⁸ “Xomxo kibun ga obêc yê xam nipaên ge od xam xovô bêga bê he yê a nipaên tax. ¹⁹ Xam obêc tiyi xocbê tibii kibun ga ge od tibii kibun ga xêyaa obêc vin lec xam tiyi xocbê he lie xam. Lêc xam o tiyi xocbê tibii kibun ga lêm, ên a vînoo xam vac he mahigun ên a nêb xam o tu tibii kibun ga i tii vac lêm, om he xêyaa vô nipaên vô xam. ²⁰ Xam xovô lec kiyang wê a nêl vô xam ên a nêbê, ‘Nu yuac ti ob ngînoo xomxo levac wê i vông ge vêl lêm.’ Tibii tii a, om obêc tii xam êno. Di he obêc timu vô kiyang wê a nêl ge od obêc timu vô kiyang wê xam nêl ge hixôn. ²¹ Xomxo obêc vông vaxvax vô xam ên wê xam tu axe ge, ên he o xovô xomxo ti wê vông a lam ge lêm.

²² “A obêc lam nêl xolac vô he ilage lêm ge od he nêl nipaên obêc yêp vô he lêm. Lêc a lam nêl xolac vô he, om o tiyi wê he ob yax nipaên wê he vông ge ti vun lêm. ²³ Xomxo ti obêc yê a nipaên ge od tiyi xocbê yê Mag nipaên hixôn. ²⁴ Do levac wê xomxo ti o vông ilage lêm ge, a obêc vông vac he mahigun lêm ge od he nêl nipaên obêc yêp vô he lêm. Lêc a lam vông mi he yê pyap, lêc he yê xii Mag nipaên. ²⁵ Mốp wê he vông ge vông kiyang wê yêp vac xolac wê he vông ge ti vô nôn lec. Kiyang tige yêp bêga nêbê, ‘He xêyaa vô myavinê vô a pisiv.’

²⁶ “Lêc xomxo wê ob ngidu xam xôn ge dô hixôn Mag om a obêc vông i lam vô xam. Ge Myakilôhô Ngibua wê ob nêl kiyang nôn, om ob lam nêl a kitong vô xam. ²⁷ Di xam êno, xam

ob nêl a kitong vô xomxo, ên xam dô hixôn a ilatikwê di i val tyip gwêbaga hixôn.

16

¹ “A nêl kiyang tige vô xam ên a nêb xam o léc sea vông vinên wê xam vông ge lêm. ² Ên tibii obêc tii xam vêl ên xumac lilo di vông xam la dô ninya, di timuên he ob hi xam wib di so nêb he vông yuac nivîha wê Anutu vông ge. ³ He ob vông môp tibêge, ên he lungên Mag di lungên a. ⁴ A nêl kiyang tiga vô xam, ên a nêb viyin tibêge obêc tulec xam timuên ge od xam xovô bê a nêl kiyang vô xam pyap.

Yesu nêl lec yuac wê Myakilôhô Ngibua ob vông ge

“A o nêl kiyang tibêge vô xam ilage lêm, ên a dô hixôn xam, ⁵ léc gwêbaga a ob lax vô xomxo ti wê vông a lam ge. Léc xam ti o kinêg a lêm bê ‘Ông ob la na?’, ⁶ ên kiyang wê a nêl vô xam gwêbaga vông xam dô hixôn nilôm viyin. ⁷ Léc a nêl hixôn nôn vô xam bê a obêc la ge od ob vô nivîha vô xam, ên a laên obêc ma ge od xomxo wê ob ngidu xam xôn ge valên obêc ma. Léc a obêc la ge od a ob vông i lam vô xam. ⁸ Di Myakilôhô Ngibua obêc val ge od ob nêl xomxo kibun ga nêl nipaên kitong di ob nêl môp nivîha kitong di ob nêl môp wê Anutu ob yaxên xomxo nêl kiyang ge kitong. ⁹ Om ob nêl xomxo nêl nipaên kitong bêga bê he o vông i vin a lêm. ¹⁰ Di ob nêl môp nivîha kitong, ên a ob lax vô Mag di xam ob wê a tii vac lêm. ¹¹ Di ob nêl kiyang wê Anutu ob yaxên xomxo nêl kiyang ge

kitong bêga bê Seten wê tu xomxo kibun ga nê levac ge, Anutu yaxên i nê kiyang pyap om obêc vông myaviwen vô i.

¹² “A kiyang tibeac yêp wê a nêb a ob nêl vô xam ge, lêc xam o tiyi wê xam ob ngô ge lêm. ¹³ Lêc Myakilôhông Ngibua wê kiyang nôn kehe ge obêc val ge od obêc didii xam la vac kiyang nôn. Lêc ob nêl ya xovôên wê ici va vông ge lêm. Nge, ob nêl kiyang wê ngô ge kitong vô xam, di ob nêl kiyang yuu môp wê ob val timuên ge kitong vô xam hixôn. ¹⁴ Myakilôhông Ngibua ob vông a lêg i vô levac, ên ob kô kiyang wê a vông ge mi lam nêl kitong vô xam. ¹⁵ Kiyang vihati wê Mag vông ge tu axe pyap om a nêl vô xam bê Myakilôhông Ngibua ob kô kiyang vô a di nêl kitong vô xam.

Nîlô viyin obêc pilepac di tu xêyaa nivîha

¹⁶ “Buc myabo tya di xam wêên a obêc ma, di obêc buc myabo tya nang, lêc xam obêc wê a tii vac.” ¹⁷ Yesu nue ngivîhi ya kinêg vônga ên nêbê, “Kiyang tige kehe bêna? Ên nêl ên nêbê buc myabo tya di il xêên i obêc ma, di buc myabo tya nang lêc il obêc xê i tii vac. Di nêl ên nêb i ob la vô Ma. ¹⁸ Om vya wê nêl ên nêbê buc myabo tya, ge kehe bêna? Il lungên kiyang tyo kehe.”

¹⁹ Yesu xovô wê he nêb ob kinêg kiyang vô i ge, om nêl vô he ên nêbê, “Kiyang wê a nêl ên a nêbê buc myabo tya di xam wêên a obêc ma, di buc myabo tya nang lêc xam obêc wê a tii vac nang, xam di kinêgma lec kiyang tige mê? ²⁰ A nêl vixôhilông nôn vô xam bê xam obêc byag nôn, lêc tibii wê o vông i vin lêm ge ob dô hixôn xêyaa nivîha. Xam obêc dô hixôn nîlôm viyin lê, lêc

nilôm viyin obêc pilepac di vông xam nilôm vô nivihã. ²¹ Obêc vô kwabo lec wê vêx ti nu obêc yubac ge od vêx tige dô hixôn viyin ên xovô nêbê buc wê ob yaxên myavinê ge vô kwabo lec, lêc nu obêc yubac vêl ge od ob xovô myavinê tii vac lêm. Nge, ob dô hixôn xêyaa nivihã ên wê nu tige yubac vêl ge. ²² Om gwêbaga xam dô hixôn nilôm viyin, lêc a obêc xê xam tii vac nang, om xam ob dô hixôn xêmyaa nivihã yang, di xomxo ti o tiyi wê ob vô xêyaa nivihã tige vêl ên xam ge lêm. ²³ Obêc vô buc timuên ge xam obêc kinêg kiyang ti vô a i tii vac nang lêm. A nêl hixôn nô n vô xam bê xam obêc kitaa susu ti vô Mag lec a lêg ge od obêc vông vô xam. ²⁴ Ilage xam o kitaa susu ti lec a lêg lêm, om xam obêc kitaa ge od xam ob kô nô n di xêmyaa obêc vô nivihã yang.

Yesu pwoo nipaên kibun ga pec

²⁵ “A nêl kiyang tige vô xam tiyi xochê kiyang pilepacên. Lêc obêc timuên ge od a ob nêl kiyang pilepacên ti i tii vac vô xam lêm. Nge, a ob nêl Mag kehe i yêp seac vô xam. ²⁶ Vô buc tige xam obêc kitaa vô Anutu lec a lêg. A o nêl vô xam bê aca va ob kitaa vô Mag ên i ngidu xam xôn lêm, ²⁷ ên Mag vaci xêyaa vin lec xam ên wê xam xêmyaa vin lec a di xam vông i vin ên xam nêbê a dô hixôn Mag lêc lam ge. ²⁸ Ilage a dô hixôn Mag lêc a sea Mag di lam kibun, di gwêbaga a ob sea kibun di lax mi la vô Mag i tii vac.”

²⁹ Mêd nue ngivihã nêl vô i ên nêbê, “Gwêbaga ông nêl kiyang yêp seac di ông o nêl kiyang pilepacên lêm. ³⁰ Om gwêbaga xe xovô ên xe nêbê ông xovô kiyang vihati pyap om ông o bin

di xomxo kinêg ông tax lêm. Om xe xovô ên xe nêbê ông dô hixôn Anutu lêc lam.”

³¹ Mêd Yesu luu he vya ên nêbê, “Gwêbaga xam vông i vin a mê? ³² Xam ngô le. Buc vô kwabo lec pyap om tibii ob tii xam sea di xam toto ge ob la bom bom di aca va ob dô tamaên. Lêcom obêc aca va lêm, ên Mag dô hixôn a. ³³ A nêl kiyang tiga vô xam ên a nêb xam dô vac a nilôg hixôn kiyang malehe. Xam obêc tulec viyin gê kibun ga, lêc xam nilôm i niviha, ên a pwoo nipaên kibun ga pec pyap.”

17

Yesu kıtaa vô Anutu nêb i ngıdu nue ngıvihi xôn

¹ Yesu nêl kiyang tige pyap di manôn la kisii di i nêl ên nêbê, “Mag, buc tyo val pyap, om ông vông a lêg i vô levac, êdêc a vông ông lêm i vô levac. ² Ên ông vông xomxo vihati la vac a kwa ngibi ên ông nêb a vông he wê ông vınoo nêb he i tu axe ge vihati i dô maviha luta lêc luta. ³ Di maviha luta dôên kehe bêga nêbê xomxo ob xovô ông bê ông Anutu nôn tıbed vıxôhilôg, di ob xovô Yesu Kılısi wê ông vông i lam ge. ⁴ A hılung xêseac wê ông vông ge gê kibun ga, di yuac vihati wê ông nêb a vông ge, a vông i la tiyi. ⁵ Mag, ilage wê kibun gên ma ge od a dô hixôn ông vac xêseac, om gwêbaga a nêb ông vông xêseac tige vô a i tii vac nang.

⁶ “A nêl ông lêm kıtong vô xomxo wê ông vınoo nêb he tu axe gê kibun ga. He ge ông nıme, di ông vông he vô a. He viac ông kıyang nivıha,

7 di gwêbaga he xovô ên he nêbê kiyang vihati wê ông vông vô a ge, lam vô ông. 8 Ên kiyang wê ông nêl vô a ge, a nêl kitong vô he mi he vông i vin. Di he xovô vixôhilôg nôn ên he nêbê a dô hixôn ông léc lam, di he vông i vin ên he nêbê ông vông a lam.

9 “Om a kitaa lec he. A o kitaa lec xomxo kibun ga vihati lêm. Nge, a kitaa ên xomxo wê ông vinoa nêb he i tu axe ge, ên he tu ông nume pyap. 10 Xomxo vihati wê tu a nuge ge tu ông nume, di ông nume vihati tu a nuge. Di môp wê he vông ge vông a lêg vô levac. 11 A ob dô kibun ga i tii vac lêm. Nge, a ob loc vô ông. Dom he ge he ob dô kibun ga. Mag, ông ngibua, om ông viac he ên he i dô vac ông lêm ti wê ông vông vô a ge nilô, di he i dô tived tiyi xocbê u tived ge. 12 Buc wê a dô hixôn he ge a viac he di he dô vac ông lêm ti wê ông vông vô a ge. A viac he nivha om he ti ob la xôa ma lêm. Léc xomxo tived ob kô myaviwen mi la xôa ma, ên kiyang wê yêp vac xolac ge i vô nôn lec. 13 Gwêbaga a ob lôc vô ông, di a nêl kiyang tige gê kibun ga, ên a nêb xêyaa nivha wê a vông ge i yêp vac he nilô.

14 “A nêl ông kiyang vô he mi he vông i vin om tibii kibun ga yê he nipaên, ên xomxo vông vinên kehe o kibun ga lêm, tiyi xocbê a kehe o kibun ga lêm. 15 A o kitaa ông bê ông kô he vêl ên kibun ga lêm. Nge, a kitaa ông ên a nêb ông viac he ên xomxo nipaên Seten. 16 He kehe o kibun ga lêm, tiyi xocbê a kehe o kibun ga lêm. 17 Ông vông he i tu ngibua ya kiyang nôn. Ên kiyang

wê ông vông ge, kiyang nôn. ¹⁸ Ông vông a lam dô vac xomxo kibun ga mahigun, om a vông he kô a kiyang mi la vac xomxo mahigun êno bêge. ¹⁹ A vông a diluhu vô ông ên he, ên a nêb he i tu nume ngibua nôn.

²⁰ “Lêc a o kitaa ên xomxo tigege vaci lêm. Nge, a kitaa ên tibii wê ob ngô he kiyang di vông i vin a hixôn ge. ²¹ Mag, a nêb xomxo tigege vihati, he i dô tived. Ên ông dô vac a nilôg di a dô vac ông nilôm, om a nêb he i dô vac u nilôd, ên xomxo kibun ga he i yê di xovô bê ông vông a lam. ²² Xêseac wê ông vông ge, a vông vô he ên a nêb he vihati i dô tived, tiyi xocbê u dô tived ge. ²³ A dô vac he nilô di ông dô vac a nilôg, om a nêb he i dô nôn tived, ên xomxo kibun ga he i yê di xovô bê ông vông a lam, di he i xovô bê ông xêmyaa vin lec he tiyi xocbê ông xêmyaa vin lec a ge.

²⁴ “Mag, ông vînoo xomxo tigege nêb he i tu axe om a nêb he i dô hixôn a vac vigwe wê a ob dô vac ge, ên he i yê xêseac wê a vông ge. Vô buc wê kibun gên ma ge, ông xêmyaa vin lec a om ông vông xêseac tigege vô a. ²⁵ Mag, ông xomxo bôbac. Xomxo kibun ga lungên ông, lêc a xovô ông, di xomxo tigege xovô nêbê ông vông a lam. ²⁶ A nêl ông lêm kitong vô he di a ob nêl i tii vac vô he, ên môp wê ông xêmyaa vin lec a ge i yêp vac he nilô di a dô vac he nilô hixôn.”

18

*Judas vông Yesu vac tibii vevac vigê
(Matyu 26:47-56; Mak 14:43-50; Luk 22:47-53)*

¹ Yesu kitaa pyap mêd la hixôn nue ngivihi mi he la mia Kidlon vilu ganê di la vac yuac ti wê yevên xax vac ge. ² Lêc Judas ti wê nêl Yesu kitong vô tibii vevac ge xovô vigwe tige, ên Yesu he nue ngivihi mi kitucma vac vigwe tige tiyi buc tibeac. ³ Om Judas kô tibii vevac Lom kidu ti di kô xêhipu wê xomxo levac daa siên hixôn he Palisi vông ge mi he la, mêd he dii ngwax di kilê susu vevac di mila vac vigwe tige.

⁴ Yesu xovô môp wê he ob vông vô i ge vihati pyap om la kwabo vô he di kinêg vô he ên nêbê, “Xam myag letya?” ⁵ Mêd he nêl vô i ên nêbê, “Xe myag Yesu Nasalet.” Om Yesu nêl vô he ên nêbê, “A ga mê.” Judas wê nêb ob vông Yesu vac he vigê ge le hixôn he. ⁶ Yesu nêl ên nêbê, “A ga xomxo tyo” mêd xomxo tige du mi lax ya nîmi di vixog sea mi la yêp kibun.

⁷ Mêd Yesu kinêg vô he tii vac ên nêbê, “Xam myag letya?” Mêd he nêl vô i ên nêbê, “Yesu Nasalet.” ⁸ Mêd Yesu nêl vô he ên nêbê, “A nêl vô xam gwêba ên a nêb a ga mê, om xam obêc myag a ge od xam vông a nuge i loc vêl lê.” ⁹ Yesu nêl kiyang tige ên nêb kiyang wê nêl ilage i vô nôl lec, kiyang ti wê nêl ên nêbê, “Xomxo wê ông vînoo ên ông nêb he i tu axe ge, a o sea ti mi i la dô xel lê.”

¹⁰ Mêlêc Saimon Pita kô yipac ti om tul vêl ên ninivi di sev xomxo levac wê mi si daa ge nu yuac ti ninya vilu hiyôv la vêl.

Nu yuac tige lê nêbê Malkas. ¹¹ Mêd Yesu nêl vô Pita ên nêbê, “Hoo yipac i lôc vac ninivi. Mia kilin wê Mag vông vô a ge, mêd a numên ob ma?”

He kô Yesu mi la vô Anas

¹² Tibii vevac tigeê hixôn xomxo levac ti wê viac he ge di xêhipu wê he Yuda vông ge he hôm Yesu xôn di ku xôn ¹³ di kô mi la tax vô Anas wê Kaiapas yen ge. Kaiapas ge wê tu xomxo daa siên nêên levac lec klismas tige. ¹⁴ Kaiapas ge wê nêên vô he Yuda ilage ên nêêbê, “Xomxo tibeê obêc yib ên ngîdu xomxo vihati xôn ge od obêc nivîha.”

Pita yax Yesu vun

(Matyu 26:69-70; Mak 14:66-68; Luk 22:55-57)

¹⁵ Saimon Pita yuu li ngîvihi ngwe, yuu la vô Yesu vîxa. Xomxo wê mi si daa gee nêên xomxo levac xovô nu ngîvihi ngwe ge, om nu ngîvihi tige la xenac lôma hixôn Yesu vac xomxo levac tige ben ¹⁶ dom Pita le vîxun. Om nu ngîvihi ngwe wê xovôxomxo levac tige lôm nêên vô vêx ti wê viac vuayen ge om kô Pita mi lam vac xenac lôma. ¹⁷ Mêêd vêx tige nêên vô Pita ên nêêbê, “Ông ge mêêd xomxo tiga nue ngîvihi ti?” Lêc Pita nêên vô i ên nêêbê, “Ma, a o tu i nue ngîvihi ti lêm.” ¹⁸ Vigwe vô ningigooên om nue yuac hixôn xêhipu vev ngwax mi nyuu, di Pita la le hixôn mi he nyuu ngwax.

Xomxo daa siên nêên levac kinêg kiyang vô Yesu

(Matyu 26:59-66; Mak 14:55-64; Luk 22:66-71)

¹⁹ Xomxo ti wê tu xomxo daa siên nêên levac ge kinêg Yesu lec nue ngîvihi di kinêg kiyang wê mi nêên vô xomxo ge. ²⁰ Om Yesu nêên vô i ên nêêbê, “Kiyang wê a mi nêên ge, ge a nêên i yêp seac vô xomxo vihati. Tîyi buc tibeac a la nêên kiyang vac Yuda xumac lilo di a nêên vac Anutu xumac ngîbua wê Yuda tibeac lam mi kitucma vac ge, di a o nêên

kiyang ti xôpacên lêm. ²¹ Bêna lêc ông kinêg kiyang vô a? Ông kinêg vô xomxo wê ngô kiyang gee bêc a nêl kiyang vatya vô he. Ên he xovô kiyang wê a nêl vô he ge.”

²² Yesu nêl kiyang tige di xêhipu wê le ge ti lam pitap Yesu lia di nêl vô i ên nêbê, “Ông ob nêl kiyang tibêge vô xomxo levac wê mi si daa ge lêmê.” ²³ Lêc Yesu nêl vô i ên nêbê, “A obêc nêl kiyang ti so ge od ông nêl kiyang tige bê kiyang tige so. Lêc kiyang wê a nêl ge obêc nôn ge, od bêna lêc ông hi a pileva?” ²⁴ Yihi gên dô lec Yesu vigê di Anas vông i la vô Kaiapas wê tu xomxo daa siên nêl levac ge.

Pita yax Yesu vun tii vac

(Matyu 26:71-75; Mak 14:69-72; Luk 22:58-62)

²⁵ Pita nyuu ngwax mi le, lêc xomxo tige kinêg vô i ên nêbê, “Ông ge xomxo tige nue ngivihî ti?” Lêc Pita nêl ên nêbê, “A o i nue ngivihî ti lêm.”

²⁶ Mêd xomxo ti wê tu xomxo daa siên nêl levac ge, nue yuac ti dô. Nu yuac tige lie ti wê Pita sev ninya lihi vêl ge om nu yuac tige nêl vô Pita ên nêbê, “A xê ông dô hixôn i vac yuac lôma.”

²⁷ Lêc Pita yax Yesu vun tii vac di lutibed kokilêx vô vya.

Yesu la le vô gavman levac Pailat manôn

(Matyu 27:1-2,11-14; Mak 15:1-5; Luk 23:1-5)

²⁸ Vô pitoc yang he sea Kaiapas ben di kô Yesu mi la gavman levac ben, lêc he Yuda nêb ob la xumac lôma hixôn lêm, ên he xona nêb he obêc la vac tibii wê o Yuda lêm ge ben ge od ob pwoo he xolac vac di o tiyi wê he ob ya vizid Pasova

ge lêm. ²⁹ Om gavman levac Pailat lam vixun vô he di kinêg vô he ên nêbê, “Xam ob vông kiyang vô xomxo tiga lec kiyang tina?” ³⁰ Om he nêl vô i ên nêbê, “Xomxo tige vôngên nipaên obêc ma ge od xe ob kô mi lam vô ông lêm.”

³¹ Mêd Pailat nêl vô he ên nêbê, “Om xam kô mi loc di loc yaxên i tiyi xocbê xolac wê xam vông ge.” Lêc he Yuda nêl vô Pailat ên nêbê, “Xam Lom vîbu xe ên xam nêbê o tiyi wê xe ob hi xomxo ti i yib ge lêm.” ³² Ilage Yesu nêl mốp wê tibii ob hi i yib ge om kiyang wê he Yuda nêl ge vông kiyang wê Yesu nêl ge vô nôn lec.

³³ Mêd Pailat lax vac ben di keac Yesu la vô i, di kinêg i ên nêbê, “Ông ge king wê he Yuda vông ge, me?” ³⁴ Lêc Yesu luu i vya ên nêbê, “Ôcông va xovô kiyang tige lêc kinêg, me xomxo ya nêl a kitong vô ông?” ³⁵ Mêd Pailat nêl vô i ên nêbê, “Bêna lêc ông kinêg kiyang tiga vô a? A o Yuda ti lêm. Ông lime Yuda hixôn xomxo levac wê mi si daa gee wê he kô ông mi lam vô a. Om ông vô va lê?”

³⁶ Lêc Yesu nêl vô i ên nêbê, “He wê la vac a kwa ngibi di a tu he nêl king ge, kehe o yêp gê kibun ga lêm. Ên kehe obêc yêp kibun ga ge od a nuge obêc vông vevac kisuu a lec ên nêb he Yuda i o lêc hôm a xôn lêm. Lêc o bêge lêm, ên mốp wê a tu he nêl king ge, o yêp gê kibun ga lêm.” ³⁷ Om Pailat kinêg vô i ên nêbê, “Om ông ge king ti?” Mêd Yesu nêl vô Pailat ên nêbê, “Ôcông va nêb a king. A lam yubac gê kibun ga di kehe bêga nêbê a ob nêl kiyang nôn i yêp seac vô xomxo. Di xomxo wê kiyang nôn yêp vac he

nilô ge wê ngô a vyag.” ³⁸ Lêc Pailat kinêg vô Yesu ên nêbê, “Kiyang nôn ge vatya?”

*Pailat nêl ên nêb he i tul Yesu lec xax pola
(Matyu 27:15-31; Mak 15:6-20; Luk 23:13-25)*

Pailat nêl bêge mêd lop mi lôm vixun vô he Yuda di nêl vô he ên nêbê, “A o tulec kiyang ti lec xomxo tiga lêm. ³⁹ Lêc môp wê xam vông ge mi yêp bêga nêbê buc Pasova ge a mi piwelac xomxo ti di vông i loc vô xam. Om xam nêb a piwelac king wê xam Yuda vông ge vêl, me?” ⁴⁰ Lêc he tyuc vya levac ên nêbê, “O xomxo tige lêm. Nge, ông vông Balabas i lôm vô xe.” Balabas ge wê mi hi xomxo di vun he susu ge ti.

19

¹ Mêd Pailat nêl di nue vevac kô Yesu mi la pisa i ya yihi. ² Mêd tibii vevac tige buu kipomac yin di tung lec Yesu bazub di kô ngakwi hi tiyi xocbê king mi vinyum ge mi la vinyum lec Yesu, ³ mêd he la le vô i manôn di nêl vô ên nêbê, “Ông king wê Yuda vông ge, ông dô nimviha.” He nêl bêge di pitap i lia.

⁴ Mêd Pailat lop mi lôm vixun tii vac di nêl vô he Yuda ên nêbê, “Xam ngô lê. A ob vông xomxo tige i lôm vô xam ên xam xovô bê a o tulec kiyang ti lec i lêm.” ⁵ Mêd Yesu lop mi lam vixun, lêc kipomac yin wê he buu ge dô lec bazub di i vinyum ngakwi hi wê king vông ge lec. Om Pailat nêl vô xomxo tige ên nêbê, “Xam wê xomxo tinê.” ⁶ Mêd xomxo levac wê mi si daa gee hixôn xêhipu yê Yesu di tyuc vya levac nêbê, “Tul i lec xax pola. Tul i lec xax pola.” Mêd Pailat nêl vô he

ên nêbê, “Om xacxam va kô i mi loc tul lec xax, ên a o tulec soên ti vô i lêm.” ⁷ Mêd he Yuda nêl vô i ên nêbê, “Xolac wê xe vông ge ti yêp bêga nêbê xomxo tige ob yib, ên yong i ên nêb i Anutu nu.”

⁸ Pailat ngô kiyang wê he nêl ge di xona mabu, ⁹ di lax vac ben xumac lôma di kinêg vô Yesu ên nêbê, “Ông vac vigwe tina?” Lêc Yesu vô myapilihi vô i. ¹⁰ Om Pailat nêl vô i ên nêbê, “Bêna lêc ông o nêl kiyang ti vô a lêmê? Xêkizêc wê a vông ge tiyi wê a ob piwelac ông vêl, di xêkizêc wê a vông ge tiyi wê he ob tul ông lec xax. Lêc mêd ông o xovô tige lêm?” ¹¹ Lêc Yesu nêl vô i ên nêbê, “Anutu lag puunê obêc vông xêkizêc vô ông lêm ge od ông o tiyi wê ông ob vông susu ti vô a lêm. Om xomxo ti wê vông a vac ông vigêm ge, nipaên wê i vông ge levac mabu luu nipaên wê ông vông ge vêl.”

¹² Pailat ngô kiyang tige mêd myag môm wê nêb ob piwelac Yesu vêl ge. Lêc he Yuda tyuc ên nêbê, “Ông obêc piwelac i vêl ge od ông o timu vô kiyang wê king Sisa vông ge lêm, ên xomxo ti obêc nêb i king ge od xomxo tige kô i lec vô Sisa.”

¹³ Pailat ngô kiyang tige mêd kô Yesu mi la vixun di lax dô lec sia wê xomxo mi dô lec di titô xomxo nêl kiyang ge. Vac he Yuda vya, he nêl vigwe tige lê nêbê Gabata, di kehe bêga nêbê pêt ngidax. ¹⁴ Vô buc tige he Yuda viac he ên vizid Pasova wê he ob ya titige mêd hiyôv tyip kitôn di Pailat nêl vô he Yuda ên nêbê, “Xam wê king wê xam vông ge lê.” ¹⁵ Lêc he tyuc ên nêbê, “Xam kô i mi loc vêl, di loc hi i lec xax pola.” Mêd

Pailat kinêg vô he ên nêbê, “Xam nêb a tul king wê xam vông ge lec xax pola, me?” Mêd xomxo levac wê mi si daa gee nêl vô i ên nêbê, “King wê xe vông ge, Sisa tived di king ngwe o dô hixôn lêm.” ¹⁶ Om Pailat vông Yesu la vac he vigê ên nêb he i tul i lec xax pola.

He hi Yesu lec xax pola

(Matyu 27:32-44; Mak 15:21-32; Luk 23:26-43)

¹⁷ Mêgem he kô Yesu mi la, mêd Yesu kilê xax pola wê he ob hi i lec ge di sea vigwe Jerusalem di mila vigwe ti wê he nêl lê vac Yuda vya nêbê Golgota, kehe bêga nêbê bazub len. ¹⁸ Mêd he tul Yesu lec xax pola vac vigwe tige, di tul tibii yuu lec xax hixôn Yesu, om Yesu yux vac mahigun di tibii yuu ge, ngwe yux vilu di ngwe yux vilu.

¹⁹ Mêd Pailat kivuu kiyang bo ti di tul lec xax hixôn. Kiyang tige nêl bêga nêbê, “YESU NASALET, KING WÊ HE YUDA VÔNG GE.”

²⁰ Vigwe wê he hi Yesu lec xax ge yêp kwabo vô Jerusalem om xomxo tibeac kitong kiyang tige, ên Pailat kivuu vac Yuda vya di Lom vya di Glik vya. ²¹ Mêgem Yuda levac wê mi si daa gee nêl vô Pailat ên nêbê, “Letya nêb ông kivuu bê king wê xe Yuda vông ge? Ông kivuu bêga bê xomxo tiga vaci nêl ên nêb i king wê Yuda vông ge.”

²² Lêc Pailat nêl vô he ên nêbê, “Kiyang wê a kivuu pyap ge ob yêp ya wê a kivuu ge.”

²³ Tibii vevac tul Yesu lec xax pyap mêd kô i ngakwi di tung i dô kidu yuudiyuu di titang vôma di toto kô. Dom ngakwi dia wê i vông ge o duuên tiyi xocbê siot yuu ngakwi baba lêm. Nge, duuên vac kwa di i la tô lec vixa. ²⁴ Om tibii vevac nêl

vôma ên nêbê, “Il ob lêx nivimihi tige lêm, om il ob tide mi xê bêc letya ob kô.” He nêl bêge om kiyang ti wê yêp vac kipihac xolac ge vô nôñ lec, kiyang wê nêl bêga nêbê,

“He titang a ngakwi tiyi he di he tide nêb he tina wê ob kô ngakwi dia wê a vông ge.”

Tibii vevac vông môp tibêge.

²⁵ Vêx yuudiyuu le vac Yesu xax pola ngibi, Yesu ta yuu li vêx, di Malia wê Klopas vinê ge yuu Malia Makdala. ²⁶ Mêd Yesu yê wê ta le ge, di a Jon, wê Yesu xêyaa vin lec a ge, a le hixôn om Yesu nêl vô ta ên nêbê, “Tag, wê. Ông num le ge.” ²⁷ Nang dêc nêl vô a ên nêbê, “Wê, tam le ge.” Mêgem buc tige a kô Yesu ta mi i la dô hixôn a vac xumac wê a vông ge.

Yesu yib

(Matyu 27:45-56; Mak 15:33-41; Luk 23:44-49)

²⁸ Tige pyap mêd Yesu xovô nêbê yuac vihati pyap, om nêl ên nêbê, “A ob num mia.” Yesu nêl bêge om kiyang bo ti wê

yêp vac kipihac xolac ge vô nôñ lec. ²⁹ Mia kilin le vac dêg om he kô myamilumac wê le vac gwec nilô ge di tinyum vac mia kilin di kilax vac xax ti di hôm la kisii vô Yesu mya. ³⁰ Yesu num mia kilin tige pyap di nêl ên nêbê, “Pyap mêga.” Nêl di kwa too di i yib.

Tibii vevac kitiv Yesu vac byeac

³¹ Buc tige, buc wê he Yuda ob viac he ên Pasova titige, ên Pasova ge da levac wê nginoo vêl ge, om he nêb xomxo ninivi i o yux lec xax pola vô buc levac lêm. Om he la nêl vô Pailat nêb

tibii i loc hi he vixa i pec ên he i yib lutibed ên he ob kwax vêl. ³² Om tibii vevac la hi tibii yuu wê he hi lec xax hixôn Yesu ge vixa pec. ³³ Dî he yê Yesu lêc yib om he o hi Yesu vixa pec lêm. ³⁴ Lêc tibii vevac ti kitiv Yesu vac byeac dî hi yuu mia lam lutibed. ³⁵ A Jon, a xê tige lec magnôn om a nêl kitong ên a nêb xam êno vông i vin. Kiyang wê a nêl ge kiyang nôn, dî aca va xovô bêga bê kiyang tige nôn vixôhilôg.

³⁶ Môp wê tibii vevac vông ge vông kiyang wê yêp vac kipihac xolac ge bo ti vô nôn lec, kiyang wê yêp bêga nêbê, “I len ti pecên obêc ma.” ³⁷ Dî kiyang ngwe yêp bêga nêbê, “Xomxo ob yê manôn lec xomxo ti wê he kitiv i ge.”

*He lii Yesu vac lôva wê le vac ngîdax ge
(Matyu 27:57-61; Mak 15:42-47; Luk 23:50-56)*

³⁸ Pyap mêd Josep wê ben Alimatia ge la kitaa Pailat ên nêb ob kô Yesu ninivi mi la yev. Josep ge vông i vin Yesu lêc o nêl kitong seac lêm, ên xona ên he Yuda. Mêd Pailat tyuc lec nêb Josep i kô Yesu ninivi om Josep la kwax Yesu ninivi vêl ên xax. ³⁹ Mêd Nikodimas ti wê la vô Yesu vô bucên ilage la hixôn, om kô xax myaluc wê nivivea nivîha ge yuu dî pilepac yuu xôn. Myaluc tige vîyin mabu tiyi xochê 30 kilo. ⁴⁰ Mêd yuu kô Yesu ninivi dî vîyum vac nivîmihi hixôn susu nivivea tige, tiyi xochê môp wê Yuda mi vông vô xomxo yibên ge. ⁴¹ Yuac ti yêp kwabo vô vîgwe ti wê he hi Yesu yib vac ge. Dî lôva wê he kiden vac ngîdax ên nêb ob lii xomxo yibên vac ge ti yêp vac yuac tige mahîgun, lêc he gên o lii yibên ti la vac lêm. ⁴² Buc tige, buc wê Yuda ob viac he

ên sabbat titige, di lôva tige yêp kwabo om yuu kô Yesu ninivi mi la lii vac lôva tyo.

20

Yesu kidi lec vac yibên

(Matyu 28:1-8; Mak 16:1-8; Luk 24:1-12)

¹ Da pitoc yang, Malia wê ben Makdala ge loc mi la lôva, léc yê wê ngidax titêc la ninya vêl ên lôva mya ge. ² Om tup mi lax vô Saimon Pita yuu li ngivihî ngwe wê Yesu xêyaa vin lec i ge di nêl vô yuu ên nêbê, “He kô Apumtau vac lôva di xe lungên vigwe wê he la lii vac ge.”

³ Mêd Pita yuu li ngivihî ngweo la nêb ob la yê vac lôva. ⁴ Yuu tup, léc li ngivihî ngwe ge luu Pita vêl di mîla le vô lôva tax, ⁵ om kilong lôva nilô léc yê nivimihî wê viyumên Yesu ninivi vac ge diyêp, léc o la vac lôva nilô lêm. ⁶ Mêd Saimon Pita mîla timuên di la vac lôva nilô mi la yê nivimihî pileva wê diyêp ge, ⁷ di yê nivimihî ti wê he viyum Yesu bazub vac ge léc o dô hixôn nivimihî wê he viyum Yesu nôn vac ge lêm. Nge, nivimihî tige buuên di i la dô viyonên. ⁸ Nang dêc nu ngivihî ngwe wê mîla lôva tax ge la vac lôva nilô di la yê om vông i vin. ⁹ Léc kiyang wê yêp vac kipihac xolac ên nêbê Yesu ob kidi lec vac yibên ge, he gên o xovô lêm. ¹⁰ Mêd nu ngivihî yuu ge lax mi la ben.

Malia wê ben Makdala ge yê Yesu

(Mak 16:9-11)

¹¹ Malia le kwabo vô lôva nivî di byag. Byag di kilong lôva nilô, ¹² léc yê angela wê vinyum ngakwi kwem ge yuu dô lec vigwe wê Yesu ninivi

yêp lec ge, ngwe dô vô bazub di ngwe dô vô vixa. ¹³ Mêd yuu nêl vô Malia ên nêbê, “Ông byag ên vatya?” Om Malia nêl vô yuu ên nêbê, “He kô a Apumtau vêl di a lungên vigwe wê he la lii vac ge.”

¹⁴ Malia nêl bêge mêd pilepac i, lêc yê wê Yesu le ge, lêc o xovô bê ge Yesu lêm. ¹⁵ Mêd Yesu nêl vô i ên nêbê, “Vêx, ông byag ên vatya? Ông myag letya?” Malia xo nêb mêd Yesu ge xomxo ti wê mi viac vigwe tige om nêl vô i ên nêbê, “Ông obêc kô xomxo tige ninivi mi la ge od ông nêl vigwe ti wê ông la lii vac ge kitong vô a, ên a ob la kô mî lôm.” ¹⁶ Mêd Yesu nêl vô i ên nêbê, “Malia.” Mêd Malia pilepac i di nêl vô Yesu vac Yuda vya bêga ên nêbê, “Labonai.” Kehe bêga nêbê xolac kehe.

¹⁷ Mêd Yesu nêl vô i ên nêbê, “Le i lêc vyax vigê lec a lêm, ên a gên o lec mî lax vô Mag lêm. Om ông lôc vô a lige di nêl vô he bê a ob lec mî lax vô a Mag di xam Mam, di a ob lax vô a Anutu di xam Anutu.” ¹⁸ Mêgem Malia Makdala lax nêl vô Yesu nue ngîvihi ên nêbê, “A xê Apumtau,” di nêl kiyang wê Yesu nêl vô i ge kitong vô he.

Yesu hilung i vô nue ngîvihi

(Matyu 28:16-20; Mak 16:14-18; Luk 24:36-49)

¹⁹ Da bucên ge Yesu nue ngîvihi kitucma mî dô, lêc he xona ên Yuda om he tung xumac lec di dô xumac lôma, mêd Yesu mîla le vac he mahigun di nêl vô he ên nêbê, “Xam nilôm i vô nivîha.” ²⁰ Yesu nêl kiyang tige di hilung vigê yuu byeac piyaha vô he om he xêyaa vô nivîha ên wê he yê Apumtau ge. ²¹ Mêd Yesu nêl tii vac vô he ên

nêbê, “Xam nilôm i vô nivîha. Mag vông a lam om a ob vông xam êno loc.” ²² Yesu nêl kiyang tige mêd vê myakilôhô lec he di nêl vô he ên nêbê, “Xam kô Myakilôhô Ngîbua. ²³ Xam obêc kitya xomxo nên nîpâên vêl ge od ob la vêl, lêc xam obêc hôm xomxo nên nîpâên xôn ge od ob yêp vô he.”

Tomas yê Yesu

²⁴ Buc wê Yesu mîla hîlung i vô nue ngivîhi ge, nue ngivîhi ti lê nêbê Tomas wê ta kô yuu li ngwe ked ge o dô hîxôn he lêm. ²⁵ Om lie ngivîhi ya nêl vô i ên nêbê, “Xe xê Apumtau.” Lêc Tomas nêl vô he ên nêbê, “A obêc xê bîlem myayen wê le vac vigê ge, di vông vigêg la vac, di vông vigêg la vac byeac lêm ge od a ob vông i vin lêm.”

²⁶ Da ti la vêl dêc nue ngivîhi kitucma mî dô vac xumac tii vac di Tomas dô hîxôn he. He dô di tung xumac lec, lêc Yesu val le vac he mahîgun di nêl vô he ên nêbê, “Xam nilôm i vô nivîha.” ²⁷ Mêd nêl vô Tomas ên nêbê, “Titô vigêm i lam di wê a vigêg ga, di vông vigêm i lam vac a byeac. Ông nilôm i o vông yuu lêm. Nge, ông vông i vin.” ²⁸ Mêd Tomas nêl vô i ên nêbê, “Ông ge a Apumtau, di ông a Anutu.” ²⁹ Mêd Yesu nêl vô i ên nêbê, “Ông wê a om ông vông i vin mê. Lêc xomxo wê o yê a lêm lêc he vông i vin ge, he ob dô hîxôn xêyaa nivîha.”

Jon kîvuu kîpîhac tiga lec kehe va?

³⁰ Yesu vông do levac tîbeac hîxôn mî nue ngivîhi yê, lêc a o kîvuu vîhati vac kîpîhac tiga lêm. ³¹ Lêc kiyang wê a kîvuu vac kîpîhac ga, a

kivuu ên a nêb xam vông i vin bê Yesu ge Kîlisi ti wê Anutu vông i lam ge di i Anutu nu, ên xam obêc vông i vin ge od xam ob dô mamviha ên wê xam vông i vin Yesu ge.

21

Yesu hilung i vô nue ngivihî vigê vilu di sec yuu

¹ Yesu dô di buc mahigun ti lêc hilung i vô nue ngivihî tii vac gê mia luaên Taibilias, om kiyang yêp bêga nêbê ² Saimon Pita dêc Tomas wê ta kô yuu li ngwe ked ge, di Nataniel wê ben Kena vac vigwe levac Galilî ge, di Sebedi nu yuu, di nue ngivihî yuu hixôn, he xôn dô. ³ Mêd Saimon Pita nêl vô he ên nêbê, “A ob la hi pis.” Lêc he nêl vô i ên nêbê, “Il xôn ob la.” Om he la lec dipac di la tung leac vac mia vô bucên dia tige, lêc he o hi pis ti lêm.

⁴ Mêd vigwe vidiiên Yesu le vô mia ninya lêc nue ngivihî o xovô bê ge Yesu lêm. ⁵ Mêd Yesu kinêg vô he ên nêbê, “Xam nuge, xam kô pis ya?” Lêc he nêl vô i ên nêbê, “Ma vêl, xe o kô pis ti lêm.” ⁶ Mêd Yesu nêl vô he ên nêbê, “Xam nêx leac i loc vac mia vô dipac vilu wê vigêm hiyôv ge od xam ob tulec pis.” Om he nêx leac la vac mia di pis tibeac hiwocên vac leac, om o tiyi wê he ob pul leac i lôm ge lêm.

⁷ Mêd nu ngivihî ti wê Yesu xêyaa vin lec i ge nêl vô Pita ên nêbê, “GeApumtau.” Pita kwax siot vêl di vông yuac mi dô, lêc ngô vya wê nêbê ge Apumtau, om vinyum ngakwi lec di sox la vac mia di la vô Yesu. ⁸ Di nue ngivihî gên dô lec

dipac om dipac didii leac hixôn pis di he lam. He lam dia tya tiyi 90 mita di mila vô mia ninya.

⁹ He lop vêl ên dipac, lêc yê wê ngwax ditum di pis yêp lec di blet dô hixôn. ¹⁰ Mêd Yesu nêl vô he ên nêbê, “Pis wê xam hi gwêbaga, xam kô ya mi lam.” ¹¹ Om Saimon Pita lec lax lec dipac nang di he didii leac lam mia ninya. Pis tigeetibeac hiwocên tiyi 153, lêc leac o tip lêm. ¹² Mêd Yesu nêl vô he ên nêbê, “Xam lam wa yaên.” Nue ngivihi xona om he ti o kinêg Yesu bê i ge letya, lêc he xovô nêbê ge Apumtau. ¹³ Mêd Yesu la hôm blet di vông vô he, dêc vông pis hixôn vô he. ¹⁴ Yesu kidi lec vac yibên di hilung i vô nue ngivihi lu tige wê vông yon ge.

Yesu nêl kiyang vô Pita

¹⁵ He ya pyap mêd Yesu kinêg vô Saimon Pita ên nêbê, “Saimon, Jon nu, ông xêmyaa vin lec a luu he baba vêl, me?” Mêd Pita nêl vô i ên nêbê, “Apumtau, ông xovô ên ông nêbê a xêgyaa vin lec ông.” Om Yesu nêl vô Pita ên nêbê, “Ông viac sipsip nue wê a vông ge.”

¹⁶ Mêd Yesu kinêg vô i lu ngwe hixôn ên nêbê, “Saimon, Jon nu, ông xêmyaa vin lec a, me?” Mêd Pita nêl vô i ên nêbê, “Apumtau, ông xovô ên ông nêbê a xêgyaa vin lec ông.” Om Yesu nêl vô i ên nêbê, “Ông viac sipsip wê a vông ge.”

¹⁷ Nang dêc Yesu kinêg vô Pita lu ti wê vông yon ge ên nêbê, “Saimon, Jon nu, ông xêmyaa vin lec a, me?” Pita nilô vô viyin ên wê Yesu kinêg i lu yon ên nêbê, “Ông xêmyaa vin lec a, me?” Om nêl vô Yesu ên nêbê, “Apumtau, ông xovô kiyang vihati di ông xovô ên ông nêbê a

xêgyaa vin lec ông.” Om Yesu nêl vô i ên nêbê, “Ông viac sipsip wê a vông ge.

¹⁸ “A nêl hixôn nôn vô ông bê buc wê ông gên ngivihî ge, ôcông va vêx ông let ði la vigwe wê ông nêb ông ob la ge, lêc obêc timuên wê ông ob vô kipwoc ge od ông ob titô vigêm la kisii ði xomxo ngwe ob vêx let lec ông ði kô ông mi la vac vigwe wê ông nêb ông la vacên obêc ma ge.” ¹⁹ Yesu nêl kiyang tige ên nêb ob nêl Pita nêl môm wê ob yib ði vông Anutu lê i vô levac ge kitong. Nêl kiyang tige pyap ðêc nêl vô Pita ên nêbê, “Lam timu vô a vixag.”

Kiyang lec nue ngivihî ti wê Yesu xêyaa vin lec i luu vêl ge

²⁰ Pita pilepac i ði yê wê li ngivihî ngwe wê Yesu xêyaa vin lec i luu vêl ge timu vô yuu vixa mi val. Li ngivihî tige wê ilage he xôn dô mi ya, lêc du mi la vô Yesu ði kinêg nêbê, “Apumtau, letya ob vông ông vac tibii vevac vigê?” ²¹ Pita yê li ngivihî tige om kinêg vô Yesu ên nêbê, “Apumtau, xomxo tige ob dô bêna?” ²² Lêc Yesu nêl vô Pita ên nêbê, “A obêc nêb xomxo tige i dô maviha ði a vena lê ge od ge yêp vô a. Om ông lam timu vô a vixag.”

²³ Mêd kiyang la vô Yesu nue vihati bêga nêbê nu ngivihî tige ob yib lêm. Lêc kiyang wê nêl nêbê ob yib lêm ge, Yesu o nêl bêge lêm. Nge, nêl ên nêbê, “A obêc nêb i dô maviha ði a vena lê ge od ge yêp vô a.”

²⁴ A, Jon, wê a nêl kiyang tige vihati kehe kitong ði kivuu vac kipihac ga, ði xe xovô ên xe nêbê kiyang wê a nêl ði kivuu ge nôn.

²⁵ Yesu vông môp tibeac hixôn om a xo ên a nêbê xomxo obêc kivuu toto ge vihati vac kipihac ge od kipihac tigeê obêc tibeac hiwocên hivun vigwe kibun ga ma vêl.

Yesu Xolac
The New Testament in the Patep Language of Papua
New Guinea
Nupela Testamen long tokples Patep long Niugini
copyright © 1986 Wycliffe Bible Translators, Inc.

Language: Patep

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-14

PDF generated using Haiola and XeLaTeX on 11 Nov 2022 from source files dated 9 Oct 2020

3d2c844d-4bc8-590b-bbf2-3a5fcd1f7ad8